

四庫全書

史部

欽定四庫全書

史部

通志卷一百九十七

詳校官編修_臣李漢

編修_臣裴謙覆勘

覆校官助教_臣金學詩

校對官主事_臣李駿

謄錄舉人_臣任銜葵

欽定四庫全書

通志卷一百九十七

宋右迪功郎鄭

樵漁仲撰

四夷傳第四

南蠻上

南蠻序略 巴郡南郡蠻

板楯蠻 獠 南平

獠 東謝蠻 西趙蠻 牂柯蠻 充州蠻 西

蠻 昆彌蠻 尾濮 木綿濮 文面濮

折腰濮赤

口濮附

黑棘濮

松外諸蠻

西南夷序略

夜郎

滇

音

邛都

茆都

茆音才各反

冉駹

音

哀牢

擇國樵僥夷附

附國

南蠻序略

昔高辛氏有犬戎之寇帝患其侵暴而征伐不克乃訪
募有能得犬戎之將吳將軍頭者購金千鎰邑萬家又

妻以少女時帝有畜狗其毛五色名曰槃瓠

魏畧曰高辛氏有老

婦患耳挑之得物大如繭老婦盛於瓠中覆
之以槃瓠頃化為犬其文五色因名曰槃瓠
令既下槃

瓠遂銜人頭造闕下羣臣怪而診之乃吳將軍首也帝大喜而計槃瓠不可妻以女又無封爵之道議欲有報而未知所宜女聞之以為帝皇下令不可違信因請行帝不得已乃以女配槃瓠槃瓠得女負而走入南山止

石室中所處險絕人跡不至

今辰州廬溪縣西有武山黃閭武陵記曰山高可萬

仞山半有槃瓠石室可容數萬人中有石狀槃瓠行跡今案山窟前有石羊石獸古跡甚多望石窟大如三間

屋遙見一石似狗形相傳為槃瓠像

於是女解去衣裳為僕鑒之結著獨

力之衣

僕鑒獨力未詳或改鑒字為豎者妄也結音髻

帝悲思之遣使尋求輒

遇風雨震晦使者不得進經三年生子一十二人六男

六女槃瓠死後自相夫妻織績木皮染以草實好五色

衣服製裁皆有尾形

千寶晉紀曰武陵長沙廬江郡夷皆槃瓠之後雜處五谿之內憑山

阻險每每為害常揉雜魚肉叩槽而號以祭槃瓠俗稱赤髀橫裙即其子孫也

其母後歸以狀

白帝於是帝使迎致諸子衣裳斑蘭言語侏離

侏離蠻夷語聲

好入山壑不樂平曠帝順其意賜以名山廣澤其後滋

蔓號曰蠻夷外癡內黠安土重舊以先父有功母帝之

女田作賈販無關梁符傳租稅之賦

優寵之故獨其賦役也荊州記曰元

陵縣居酉口有上就武陽二鄉惟此是有邑君長皆賜
槃瓠子孫狗種也二鄉在武漢之北

印綬冠用獼皮名渠帥曰精夫相呼為婁徒

說文曰婁女人自稱

婁我也音烏胡反此已上皆見風俗通也

今長沙武陵蠻是也其在唐虞與

之要質故曰要服夏商之時漸為邊患逮於周世黨衆
彌盛宣王中興乃命方叔南伐蠻方詩人所謂蠻荆來
威者也又曰蠢爾蠻荆大邦為讐明其黨衆繁多是以
抗敵諸夏也平王東遷蠻遂侵暴上國晉文侯輔政乃
率蔡共侯擊破之至楚武王時蠻與羅子共敗楚師殺

其將屈瑕莊王初立民饑兵弱復為所寇楚師既振然
後乃服自是遂屬於楚鄢陵之役蠻與共王合兵擊晉
及吳起相悼王南并蠻越遂有洞庭蒼梧秦昭王使白

起伐楚畧取蠻夷始置黔中郡漢興改為武陵

黔中故城在今

辰州沅陵縣西

歲令大人輸布一疋小口二丈是為實布

說文曰南

蠻賦也

雖時為寇盜而不足為郡國患光武中興武陵

蠻夷特盛建武二十三年精夫相單程等據其險隘大
寇郡縣遣武威將軍劉尚發南郡長沙武陵兵萬餘人

乘船泝沅水入武谿擊之

沅水出牂牁故且蘭東北經辰州潭州岳州經洞庭湖入

也江尚輕敵入險山深水疾舟船不得上蠻人知尚糧少

入遠又不曉道徑遂屯聚守險尚食盡引還蠻緣路徼戰尚軍大敗悉為所沒二十四年相單程等下攻臨沅遣謁者李嵩中山太守馬成擊之不能尅明年春遣伏波將軍馬援中郎將劉匡馬武孫永等將兵至臨沅擊破之單程等饑困乞降會援病卒謁者宗均聽悉受降為置吏司羣蠻遂平肅宗初武陵澧中蠻陳從等反叛

入零陽蠻界

零陽縣屬武陵

其冬零陽蠻五里精夫為郡擊破

從從等皆降三年冬淩中蠻覃兒健等復反

淩水名源出澧州崇

義縣也

攻燒零陽作唐孱陵界中

作唐縣屬武陵郡孱陵縣故城今荊州公安縣

西南孱音仕顏反

明年春發荊州七郡及汝南潁川弛刑徒吏

士五千餘人拒守零陽募充中五里蠻精夫不叛者四

千人擊澧中賊

充縣屬武陵郡充音衝

五年春覃兒健等請降不

許郡因進兵與戰於宏下大破之斬兒健首餘皆棄營

走還淩中復遣乞降乃受之於是罷武陵屯兵賞賜各

有差和帝永元四年冬淩中澧中蠻潭戎等反燔燒郵
亭殺畧吏民郡兵擊破降之安帝元初二年澧中蠻以
郡縣徭稅失平懷怨恨遂結充中諸種二千人攻城殺
長吏州郡募五里蠻六亭追擊破之皆散降賜五里六
亭渠帥金帛各有差明年秋淩中澧中蠻四千人並為
盜賊又零陵蠻羊孫陳湯等千餘人零陵縣屬武陵郡也著赤幘
稱將軍燒官寺抄掠百姓州郡募善蠻討平之順帝永
和元年武陵太守上書以蠻夷率服可比漢人增其租

賦議者皆以為可尚書令虞詡獨奏曰自古聖王不臣異俗非德不能及威不能加知其獸心貪婪難率以禮義是故爵縻而綏撫之附則受而不逆叛則棄而不追先帝舊典貢稅多少所由來久矣今猥增之必有怨叛計其所得不償所費必有後悔帝不從其冬澧中淩中蠻果爭實布非舊約遂殺鄉吏舉種反叛明年春蠻一萬人圍充城八千人寇夷道遣武陵太守李進討破之斬首數百級餘皆降服進乃簡選良吏得其情和在郡

九年梁太后臨朝下詔增進秩二千石賜錢二十萬桓
帝元嘉元年秋武陵蠻詹山等四千餘人反叛拘執縣
令屯結深山至永興元年太守應奉以恩信招誘皆悉
降散永壽三年十一月長沙蠻反叛屯益陽至延熹三
年秋遂抄掠郡界衆至萬餘人殺傷長吏又零陵蠻入
長沙冬武陵蠻六千餘人寇江陵荊州刺史劉度謁者
馬睦南郡太守李肅皆奔走肅主簿胡爽叩馬首諫曰
蠻夷見郡無儆備故敢乘間而進明府為國大臣連城

千里舉旄鳴鼓應聲十萬奈何委符守之重而為逋逃
之人乎肅拔刃向爽曰掾促去太守今急何暇此計爽
抱馬固諫肅遂殺爽而走帝聞之徵肅棄市度睦減死
一等復爽門閭拜家一人為郎於是以前校令度尚為
荊州刺史討長沙賊平之又遣車騎將軍馮緄討武陵
蠻並皆降散軍還賊復寇桂陽太守廖祈奔走武陵蠻
亦更攻其郡太守陳奉率吏民擊破之斬首三千餘級
降者二千餘人至靈帝中平三年武陵蠻復叛寇郡界

州郡擊破之東晉時沔中蠻因劉石亂後漸徙於陸渾

以南徧于邑落宋齊以後荆雍二州

荆州江陵郡
雍州襄陽郡

各置

校尉以撫寧之羣酋蠻帥互受南北朝封爵至後魏末

暴患滋甚僭稱侯王屯據峽路斷絕行旅周武帝遣開

府陸騰破平之又有別種蠻曰獠徃代出自梁益間自

漢中達于邛笮李勢時始出巴西渠川廣漢陽安資中

犍為梓潼布滿山谷十餘萬落為梁益大患及後周平

梁益遂從賦役頗同華人然天性暴亂撫御少失擾動

隨之唐世兵威遠被其黔中蠻曰東謝西趙者自昔不
為王臣皆置羈縻州使相攝領自是南寧昆瀾諸濮及
松外諸蠻往往皆稽服焉

巴郡南郡蠻

巴郡南郡蠻本有五姓巴氏樊氏暉氏

音審

相氏鄭氏皆

出於武落鍾離山

世本曰廩君之
先故出巫誕也

其山有赤黑二穴巴

氏之子生於赤穴四姓之子皆生黑穴未有君長俱事
鬼神乃共擲劍於石穴約能中者奉以為君巴氏子務

相乃獨中之衆皆歎又令各乘土船約能浮者當以為君餘姓悉沈唯務相獨浮因共立之是為廩君乃乘土

船從夷水至鹽陽

荊州圖經曰副夷縣西有溫泉古老相傳此泉原出鹽今水有鹽氣縣西

一獨山有石穴有二大石並立穴中相去可一丈俗名為陰陽石陰石常隰陽石常燥盛弘之荊州記曰昔廩君浮夷水射鹽神於陽石之上案今施州清江縣水一名鹽水源出清江縣西都亭山水經云夷水出巴郡魚復縣注云水色清照十丈分沙石蜀人見澄清因名清江鹽水有神女謂廩君曰此

地廣大魚鹽所出願留共居廩君不許鹽神暮輒來取宿旦即化為蟲與諸蟲羣飛掩蔽日光天地晦冥積十

餘日廩君思其便因射殺之天乃開明

世本曰廩君使人操青縷以遺

鹽神曰嬰此即相宜乃與女俱不宜將去鹽神受縷而嬰之廩君即立陽石上詹青縷而射之中鹽神鹽神死

天乃大開明也廩君於是君乎夷城四姓皆臣之廩君死冤冤

世為白虎巴氏以虎飲人血遂以人祠焉及秦惠王并

巴中以巴氏為蠻夷君長世尚秦女其民爵比不更有

罪得以爵除其君長歲出賦二千一十六錢三歲一出

義賦千八百錢其民戶出幪布八丈二尺雞羽三十錕

說文幪南郡蠻夷布也音公亞反毛詩四錕既鈞儀禮矢錕一乘鄭元注曰錕猶候也候物而射之也三十錕

一百二十矢俗本掾作
蒙鏃作鏃者並誤也

漢興南郡太守靳彊請一依秦

時故事至建武二十三年南郡潺山蠻雷遷等始反叛

潺音屠

寇掠百姓遣武威將軍劉尚將萬餘人討破之徙

其種人七千餘口置江夏界中今沔中蠻是和帝永

元十三年巫蠻許聖等

巫縣屬南郡

以郡收稅不均懷怨恨

遂屯聚反叛明年夏遣使者督荊州諸郡兵萬餘人討

之聖等依憑沮隘久不破諸軍乃分道並進或自巴郡

魚復數路攻之蠻乃散走斬其渠帥乘勝追之大破聖

等聖等乞降復悉徙置江夏靈帝建寧二年江夏蠻叛
州郡討平之光和三年江夏蠻復反與廬江賊黃穰相
連結十餘萬人攻沒四縣寇患累年廬江太守陸康討
破之餘悉降散

板楯蠻

板楯蠻夷者秦昭襄王時有一白虎常從羣虎數遊秦
蜀巴漢之境傷害千餘人昭王乃重募國中有能殺虎
者賞邑萬家金百鎰時有巴郡閬中夷人能作白竹之

弩乃登樓射殺白虎

華陽國志曰巴夷廖仲等射殺之也

昭王嘉之而以

其夷人不欲加封乃刻石盟要復夷人頃田不租十妻

不算

優寵之故一户免其一頃田之稅雖有十妻不輸口算之錢復音福

傷人者論殺人

得以俛錢贖死

何承天纂文曰俛蠻夷贖罪貨也音徒濫反

盟曰秦犯夷輸

黃龍一隻夷犯秦輸清酒一鍾夷人安之至漢高祖為

漢王發夷人還伐三秦秦地既定乃遣還巴中復其渠

帥羅朴督鄂度夕龔七姓不輸租賦餘戶乃歲入實錢

口四十世號為板楯蠻夷閭中有渝水其人多居水左

右天性勁勇初為漢前鋒數陷陳俗喜歌舞高祖觀之
曰此武王伐紂之歌也乃命樂人習之所謂巴渝舞也
遂世世服從至於東漢郡守常率以征伐桓帝之世板
楯數反太守蜀郡趙溫以恩信降服之靈帝光和三年
巴郡板楯復叛寇掠三蜀及漢中諸郡靈帝遣御史中
丞蕭瑗督益州兵討之連年不能尅帝欲大發兵乃問
益州計吏考以征討方畧漢中上計程包對曰板楯七
姓射殺白虎立功先世復為義人其人勇猛善於兵戰

昔永初中羗入漢川郡縣破壞得板楯救之羗死敗殆
盡故號為神兵羗人畏忌傳語種輩勿復南行至建和
二年羗復大入實賴板楯連摧破之前車騎將軍馮緄
南征武陵雖受丹陽精兵之銳丹陽楚也南郡枝江有丹陽故城亦倚
板楯以成其功近益州郡亂太守李顥亦以板楯討而
平之忠功如此本無惡心長吏鄉亭更賦至重僕役箠
楚過於奴虜亦有嫁妻賣子或乃至自剄割雖陳寃州
郡而牧守不為通理闕庭悠遠不能自聞含怒呼天叩

心窮谷愁苦賦役因羅酷刑故邑落相聚以致叛戾非
有謀王僭號以圖不軌今但選明能牧守自然安集不
煩征伐也帝從其言遣太守曹謙宣詔赦之即皆降伏
至中平五年巴州郡黃巾賊起板楯蠻夷因此復叛寇
掠城邑遣西園上軍別部司馬趙瑾討平之及漢末天
下大亂自巴西之宕渠遷於漢中楊車坂抄掠行旅號
為楊車巴氏魏武克漢中李特之祖將五百家歸之魏
武又遷於畧陽北復號之為巴氏蜀後主建興十一年

涪陵屬國人夷反車騎將軍鄧芝往討皆破平之其沔
中蠻至晉世劉石之亂漸得北遷陸澤以南滿於山谷
宛洛蕭條郡邑邱墟矣後魏道武定中山聲教被於河
表泰恒八年蠻王福安率渠帥數千朝於代都求留質
子太武始光中拜安侍子豹為安遠將軍江州刺史順
陽公是時羣蠻亦復臣屬江左宋因晉舊於荊州置南
蠻校尉雍州置寧蠻校尉以領之蠻人順附者輸穀數
斛無餘雜調而宋人賦役嚴苦貧者不復堪命多逃入

蠻無徭役彊者又不供官稅結黨連羣動有數百千人

州郡力弱則起為盜賊種類稍多戶口不可知也文帝

元嘉十八年天門

今澧陽郡地

淩中令宋矯之徭賦過重蠻

不堪命蠻田向求等為寇破淩中虜略百姓荊州刺史

衡陽王義季遣兵討破之二十年南郡臨沮當陽蠻反

縛臨沮令傅驥荊州刺史南譙王義宣遣兵討破之初

雍州刺史劉道產善撫諸蠻前後不附者皆引出平土

多緣沔為居及道產亡蠻又反叛至孝武出為雍州羣

蠻斷道臺遣太子步兵校尉沈慶之連年討蠻所向皆
平孝武即位後大明中西陽蠻與諸蠻并叛沈慶之率
江雍荊河州諸軍討之僅定明帝順帝世暴亂尤甚荊
州為之虛弊齊高帝時武陵蠻田思飄武帝時黔陽蠻
田豆渠湘州蠻陳雙並寇掠州郡其後雍司州蠻北通
於魏頗為侵擾永明中除郢州蠻帥田駟路為試守北
遂安左郡太守田驢王為試守宜人左郡太守田何代
為試守新平左郡太守以慰安之先是魏文成興光中

蠻王文武龍請降魏拜為南雍州刺史魯陽侯孝文延
興中大陽蠻酋桓誕擁漢水以北潢葉以南八萬餘落
遣使內屬孝文拜誕征南將軍東荊州刺史襄陽王聰
自選郡縣誕字天生晉偽楚桓元之子也元之敗也西
奔至枚廻洲被殺誕時年數歲流竄大陽蠻中遂習其
俗及長多智謀為羣蠻所歸誕既內屬居朗陵太和四
年王師南伐誕請為前驅乃授使持節南征西道大都
督討義陽不果而還十年移居潁陽十六年依例降王

為公十七年加征南將軍中道大都督征竟陵遇遷洛
師停是時齊征虜將軍直閣將軍蠻酋田益宗率部曲
四千餘戶內屬襄陽酋雷婆思等十一人率戶千餘內
徙求居大和川詔給廩食後開南陽全有沔北之地蠻
人安堵不為寇賊十八年誕入朝賞遇隆厚卒謚曰剛
子暉字道進位龍驤將軍東荊州刺史襲爵景明初大
陽蠻酋田育邱等二萬八千戶內附詔置四郡十八縣
暉卒贈冠軍將軍三年魯陽蠻魯北鷺等聚眾攻逼頻

詔左衛將軍李崇討平之徙萬餘家於河北諸州及六鎮尋叛南走所在追討比及河殺之皆盡四年東荊州蠻素安反僭帝號正始元年素安弟秀安復反李崇楊大眼悉討平之二年梁沔東太守田清喜擁七郡三十一縣戶萬九千遣使內附乞師討梁其雍州以東石城以西五百餘里水陸援路請率部曲斷之四年梁永寧太守文雲生六部自漢東遣使歸附初東荊州表太守桓叔興前後招慰大陽蠻歸附者一萬七百戶請置郡

十六縣五十詔前鎮東府長史酈道元檢行置之叔興
即暉弟也延昌元年拜南荊州刺史居安昌隸於東荊
州三年梁遣兵討江沔諸蠻百姓擾動蠻自相督率二
萬餘人頻請統帥於叔興以為聲勢叔興給一統帥并
威儀為之節度蠻人遂安其年梁荊州刺史蕭藻遣其
將蔡令孫等三將寇南荊之西南沿襄沔上下討掠諸
蠻蠻酋龍驤將軍樊石廉叛梁請援於叔興叔興遣將
與石廉督集蠻夏二萬餘人擊走之斬令孫等三將藻

又遣其新陽太守邵道林於沔水之南石城東北立清水戍為抄掠之基叔興遣諸蠻破之四年叔興上表請不隸東荊州許之梁人每有寇抄叔興必摧破之正光中叔興擁所部南叛蠻酋成龍彊率戶數千內附拜刺史蠻帥田牛生率戶二千內徙揚州拜為郡守梁義州刺史邊城王文僧明鐵騎將軍邊城太守田官德等率戶萬餘舉州內屬拜僧明平南將軍西豫州刺史封開封侯官德龍驤將軍義州刺史自餘封授各有差僧明

官德並入朝蠻出山至邊城建安者八九千戶義州尋
為梁將裴邃所陷梁定州刺史田超秀亦遣使求附請
援歷年朝廷恐輕致邊役未之許會超秀死其部曲遂
相率內附其後六鎮秦隴所在反叛二荆西郢蠻大擾
動斷三鵞路殺都督寇盜至於襄城汝水百姓多被其
害梁遣將圍廣陵楚城諸蠻並為前驅自汝水以南恣
其暴掠連年攻討散而復合其暴滋甚又有冉氏向氏
田氏者陬落尤盛餘則大者萬家小者千戶更相崇署

僭稱王侯屯據三峽斷遏水路荆蜀行人至有假道者
周文畧定伊瀍聲教南被諸蠻畏服靡然向風矣大統
五年蔡陽蠻主魯超明內屬授南雍州刺史仍世襲焉
十一年蠻酋梅勒特來貢其方物尋而蠻帥杜青和及
江漢諸蠻擾動大將軍楊忠擊破之其後杜青和自稱
巴西州刺史入附朝廷因其所稱而授之杜青和後遂
反攻圍東梁州其唐州蠻田魯嘉亦叛自號豫州伯王
雄權景宣等前後討平之廢帝初蠻酋樊舍舉落內附

以為督淮北三州諸軍事淮州刺史淮安郡公于謹等
平江陵諸蠻騷動詔豆盧寧蔡祐等討破之恭帝二年
蠻酋宜人王田興彥北荊州刺史梅季昌等相繼款附
以興彥季昌並為開府儀同三司加季昌洛州刺史賜
爵石臺縣公其後巴蜀西人譙淹扇動羣蠻以附梁蠻
帥向鎮侯向白虎等應之向五子王又攻陷信州田烏
度田唐等抄斷江路文子榮復據荊州之政陽郡自稱
江州刺史并隣州刺史蒲微亦舉兵逆命詔田宏賀若

敦潘和李遷哲等討破之周武成初文州蠻反州軍討定之尋而冉令賢向五子王等又攻陷白帝殺開府楊長華遂相率作亂前後遣開府元契剛等總兵出討雖頗剪其族類而元惡未除天和元年詔開府陸騰督王亮司馬裔等討之騰水陸俱進次於湯口先遣喻之而令賢方浚城池嚴設扞禦遣其長子西黎次子南王領其支屬於江南險要之地置立十城遠結涪陽蠻為其聲援令賢率其卒固守水邏城騰乃總集將帥謀進趣

咸欲先取水邏然後經畧江南騰言於衆曰今賢內恃水邏金湯之險外託潯陽輔車之援無復資糧充實器械精新以我懸軍攻其嚴壘脫一戰不尅更成其氣不如頓軍湯口先取江南翦其毛羽然後遊軍水邏此制勝之計也衆皆然之乃遣開府王亮率衆渡江旬日攻拔其八城凶黨奔散獲賊帥冉承公并生口三千人降其部衆一千戶遂簡募驍勇數道分攻水邏路經石壁城極其險峻四面壁立故以名焉唯有一小路緣梯而

上蠻蜚以為峭絕非兵衆所行騰被甲先登衆軍繼進
備經危阻累日乃得舊路騰先任隆州總管雅知其路
蠻帥冉伯犁冉安西與令賢有隙騰乃招誘伯犁等結
為父子又多遺錢帛伯犁等悅遂為鄉導水邏側又有
石勝城者亦號險要令賢使其兄龍真據之騰又密告
龍真云若平水邏使其代令賢處之龍真大悅遣其子
詣騰騰厚加禮接賜以金帛蠻貪利既深仍請立効乃
謂騰曰欲翻所據城恐人力寡少騰許以三百兵助之

既而遣二千人銜枚夜進龍真力不能禦遂平石勝城
晨至水邏蠻衆大潰斬首萬餘級令賢遁走追而獲之
司馬裔又別下其二十餘城獲蠻帥并三公等騰乃積
其骸骨於水邏城側為京觀後蠻蠻望見輒大哭自此
狼戾之心輟矣時向五子王據石墨城令其子寶勝據
雙城水邏平後頻遣喻之而五子王猶不從命騰又遣
王亮屯牢坪司馬裔屯雙城以圖之騰慮雙城孤峭攻
未可拔賊若委城遁散又難追討乃令諸軍周廻立柵

遏其走路賊乃大駭於是縱兵擊破之禽五子王於石
墨獲寶勝於雙城悉斬諸向首領生禽萬餘口信州舊
居白帝騰更於劉備故宮城南八陳之北臨江岸築城
移置信州又以巫縣信陵秭歸並築城置防以為襟帶
焉天和六年蠻渠冉祖憺冉龍驤又反詔大將軍趙闇
討平之自是羣蠻懼息不復為寇矣

獠

獠者蓋南蠻之別種自漢中達於邛笮川洞之間所在

皆有種類甚多散居山谷畧無氏族之別又無名字所
生男女唯以長幼次第呼之其丈夫稱阿暮阿段婦人
阿夷阿等之類皆語之次第稱謂也依樹積木以居其
上名曰干蘭干蘭大小隨其家口之數徃徃推一長者
為王亦不遠相統攝父死則子繼若中國之貴族也獠
王各有鼓角一隻使其子弟自吹擊之好相殺害多仇
怨不敢遠行能卧水底持刀刺魚其口嚼食並鼻飲死
者豎棺而埋之性同禽獸至於忿怒父子不相避唯手

有兵刃者先殺之若殺其父走避於外求得一狗以謝其母然後敢歸母得狗謝不復嫌恨若報怨相攻擊必殺而食之平常却掠賣取猪狗而已親戚比隣指授相賣被賣者號哭不服逃竄避之乃將買人捕逐若亡叛獲便縛之但經被縛者即服為賤隸不敢稱良矣亡失兒女一哭便止不復追思唯執楯持矛不識弓矢用竹為簧羣聚鼓之以為音節能為細布色至鮮淨大狗一頭買一生口其俗畏鬼神尤尚淫祀所殺之人美鬚鬢

者乃剥其面皮籠之以竹及燥號之曰鬼鼓舞祀之以
求福利至有賣其昆季妻孥盡者乃自賣以供祭焉鑄
銅為器大口寬腹名曰銅爨既薄且輕易於熟食李勢
在蜀時諸僚始出巴西渠川廣漢陽安資中犍為梓潼
布在山谷十餘萬落攻破郡縣為梁益之患勢為晉將
桓溫所伐內外受敵所以亡也自是蜀漢衰弱力不能
制其後土人東流山險之地多空僚遂挾山傍谷與夏
人參居頗輸租賦在深山者仍不為編戶梁益二州歲

伐獠以裨潤公私頗藉為利後魏宣武正始中梁漢中
太守夏侯道遷舉州內附宣武遣尚書邢巒為梁益二
州刺史以鎮之近夏人者安堵樂業在山谷者不敢為
寇後以羊祉為梁州傅豎眼為益州祉性酷虐不得物
情梁輔國將軍范季旭與獠王趙清荆率眾屯孝子谷
祉遣統軍趙明擊走之後梁寧朔將軍姜白復擁夷獠
入屯南城梁州人王法慶與之通謀眾屯於固門川祉
遣征虜將軍討破之豎眼施恩布信大得獠和後以元

法僧代傳豎眼為益州法僧在任貪殘獠遂反叛勾引
梁軍圍逼晉壽朝廷憂之以豎眼先得物情復令乘傳
往撫獠聞豎眼至莫不欣然拜迎道路於是而定及元
恒元子真相繼為梁州並無德績諸獠甚苦之後朝廷
以梁益二州控攝險遠乃設巴州以統諸獠後以巴酋
嚴始欣為刺史又立隆城鎮所綰獠二十萬戶所謂北
獠也歲輸租布又與外人交通貿易巴州生獠並皆不
順其諸頭王每於時節謁見刺史而已明帝孝昌初諸

獠以始欣貪暴相率反叛攻圍巴州山南行臺魏子建
勉諭之即時散罷自是獠與諸頭王相率詣行臺者接
踵子建厚勞來之始欣見中國多事又失獠心慮獲罪
譴時南梁州刺史陰子春扇惑邊陲始欣謀將南叛始
欣族子愷時為隆城鎮將密知之嚴設邏候遂禽梁使
人並封始欣詔書鐵券刀劍衣冠之屬表送行臺子建
乃啟以鎮為南梁州愷為刺史發使執始欣囚於南鄭
遇子建見代梁州刺史傅豎眼仍為行臺豎眼久病其

子敬紹納始欣重賂使得還州始欣乃起衆攻愷屠滅之據城南叛梁將蕭玩率衆援接時梁益二州並遣將討之攻陷巴州執始欣大破玩軍遂斬玩以傳檄表為刺史後元羅為梁州以州入梁自此遂絕及周文平梁益之後令在所撫慰其與華人雜居者亦頗從賦役然天性暴亂旋致擾動每歲命隨近州鎮出兵討之獲其生口以充賤隸謂之為壓獠焉復有商旅往來者亦資以為貨公卿達於人庶之家有獠口者多矣恭帝三年

陵州木籠獠反詔開府陸騰討破之周保定二年鐵山
獠又反抄斷江路陸騰又攻拔其三城天和三年梁州
恒稜獠叛總管長史趙文表討之軍次巴州文表欲率
衆徑進軍吏等曰此獠旅拒日久部衆高彊宜分兵四
面攻之以離其勢今若大軍直進不遣奇兵恐并力於
我未可制勝文表曰往者既不能制今須別為進趣若
四面遣兵則獠降路絕理當相率以死拒戰如從一道
則吾得示威恩遣人以理曉諭為惡者討之歸善者撫

之善惡既分易為經略事有通變奈何欲遵前轍也文表遂以此意遍令軍中時有從軍熟獠多與恒稜親識即以實報之恒稜獠相與聚議猶豫之間文表軍已至其界獠中先有二路一路稍平一路極險俄有生獠酋帥數人來見文表曰我恐官軍不悉山川請為鄉導文表謂之曰此路寬平不須導引卿但先去好慰喻子弟也乃遣之文表謂其衆曰向者獠帥謂吾從寬路而行必當設伏險要若從險路出其不虞獠衆自離散矣於

是勒兵從險道進其有不通之處即平之乘高而望果見其伏兵獠既失計爭攜妻子退保險要文表頓軍大蓬山下示以禍福遂相率來降文表皆撫慰之仍徵其租稅無敢動者後除文表為蓬州刺史又大得人和建德初李暉為蓬梁總管諸獠亦望風從附然其種類滋蔓保據巖壑依山走險若履平地雖屢加兵弗可窮討性又無知殆同禽獸諸夷之中最難以道義招懷者也

南平獠

南平獠東距智州南屬渝州西接南州北接涪州部落
四千餘戶多瘴癘山有毒草沙蟲蝮蛇人樓居梯而上
名為干欄婦人橫布三幅穿中貫其首號曰通裙美髮
髻垂於後竹筒三寸斜穿其耳貴者飾以珠璫俗女多
男少婦人任役昏法女先以貨求男貧者無以嫁則賣
為婢男子左袒露髮徒跣其王姓朱氏號劍荔王唐貞
觀三年遣使入朝以其地隸渝州

東謝蠻

東謝蠻渠帥姓謝氏居黔州西三百里南距守宮獠西連夷子地方千里宜五穀為畬田歲一易之衆處山巢居汲流以飲無賦稅刻木為契見貴人執鞭而拜賞有功者以牛馬銅鼓犯小罪則杖大事殺之盜物者倍償婚姻以牛酒為聘女歸夫家夫慙澁旬日乃出會擊銅鼓吹角俗椎髻韜以絳垂於後坐必蹲踞常帶刀劍男子服衫襖大口袴以帶斜繚右肩以螺殼虎豹獾犬羊皮為飾有謝氏世為酋長部落尊畏之其族不育女

自以姓高不可以嫁人貞觀三年其酋元深入朝冠烏皮若注旄以金銀絡額被毛帔韋行滕著履帝以其地為應州隸欽州都督府

西趙蠻

西趙蠻在東謝之南並南蠻別種其界東至夷子西至昆明南至西洱河山洞深阻莫知里數南北十八日行東西二十三日行其風俗與東謝同趙氏代為酋長有萬餘戶不臣中國黔州豪帥田康諷之唐貞觀中首領

趙酋摩遣使入朝後率所部內附詔以酋摩為刺史

牂柯蠻

牂柯渠帥姓謝氏舊臣中國世為本土牧守隋亂遂絕
唐貞觀中其酋遣使修貢勝兵數萬遂列其地為牂州

兗州蠻

兗州牂柯別部與牂柯隣境勝兵二萬
今黔中郡唐貞

觀中朝貢列其地為兗州

西爨蠻

西爨者南寧之渠帥梁時通焉自云本河東安邑人七
世祖晉南寧太守中國亂遂王蠻中梁元帝時南寧州
刺史徐文盛徵詣荊州有爨瓚者據其地延袤二千餘
里土多駿馬犀象明珠既死子震翫分統其衆隋開皇
初遣使朝貢命韋世冲以兵戍之置恭州協州昆州未
幾叛史萬歲擊之至西洱河滇池而還震翫懼而入朝
文帝誅之諸子沒為奴唐高祖即位以其子宏達為昆
州刺史奉父喪歸而益州刺史段倫遣俞大施至南寧

治其範川誘諸部皆納款貢方物太宗遣將擊西爨開
青蛉弄棟為縣

昆彌蠻

昆彌一曰昆明在爨之西以西洱河為境即葉榆河也
距長安九千里土歌濕宜秔稻人辯首左衽與突厥同
隨水草畜牧夏處高山冬入深谷俗尚戰死惡病亡勝
兵數萬漢武得其地入益州部其後復絕諸葛亮定南
中亦所不至唐武德中雋州治中吉偉使南寧至其國

諭使朝貢因求內屬發兵戍守自是歲與牂柯使偕來

尾濮

尾濮漢魏以後在興古郡

今雲南郡地

西南千五百里徼外

其人有尾長三四寸欲坐輒先穿地為穴以安其尾尾折便死居木上食人俗又噉其老者唯識母而不識父其俗有賓客殺老者以供厨故賓婚有老者必泣其地有稷及陸稻多鹽井饒犀象有弓矢革鎧以赤猱猴皮垂錫珠翡翠為冠幘按木濮即尾濮也

又扶南土俗傳云拘利東有蒲

羅人皆有尾長五六寸其俗食人按其地並在西南蒲羅蓋尾濮之地名

木綿濮

木綿濮產木綿特異生房甚繁房中綿其大如拳

文面濮

折腰濮赤口濮附

文面濮其俗劓面以青畫之劉音說又有折腰濮其俗生

子必折其腰又有赤口濮在永昌南其俗折其齒劓其脣使赤又裸露無衣服

黑焚濮

黑黻濮在永昌西南山居耐勤苦其衣服婦人以一幅布為裙或以貫頭丈夫以穀皮為衣其境出白蹄牛犀

象琥珀金桐華布又諸濮之域皆出楛矢

爾雅曰南至於濮鉛周書

王會卜人丹沙注云卜人西南之蠻丹沙所出今按卜人蓋濮人也

松外諸蠻

松外諸蠻數十百部大者五六百户小者二三百凡數十姓趙楊李董為貴族皆擅山川不能相君長有城郭文字頗知陰陽歷數自夜郎滇池以西皆莊蹻之裔有

稻麥粟豆絲麻薤蒜桃李以十二月為歲首布幅廣七寸正月蠶生二月熟男子犴革為帔女衣純布裙衫髻盤如髻飯用竹筲搏而噉之象杯貯羹如雞彛徒跣有舟無車死則坎地殯舍左屋之三年乃葬以蠡蚌封棺父母喪斬衰布衣不澡者四五年近者二三年為人所殺者子以麻括髮墨面衣不緝居喪婚嫁不廢亦弗避同姓壻不親迎富室娶妻納金銀牛羊酒女所齋亦如之有罪者樹一長木擊鼓集衆其下彊盜殺之富者貰

死燒屋奪其田盜者倍九而償贓姦淫則彊族輸金銀
請和而棄其妻處女嫠婦不坐凡相殺必報力不能則
其部助攻之祭祀殺牛馬親聯畢會助以告酒多至數
百人唐貞觀中數叛亂太宗遣武侯將軍梁建方發蜀
十二州兵討之首領雙舍拒戰敗走殺獲十餘萬建方
諭降者七十餘部戶千萬署首領蒙和為縣令以撫之

西南夷序畧

南夷君長以十數夜郎最大

後為縣屬
牂柯郡

其西靡莫之屬

以十數滇最大

地有滇池因以
為名滇音顛

自滇以北君長以十數

邛都最大

今之邛州
本其地

此皆椎結耕田有邑聚其外西自

桐師以東北至葉榆

葉榆澤名後為
縣屬益州郡

名為僞昆明

僞即
今之

僞州昆明又在其西南即今之南
寧州諸蠻所居是其地也僞音髓

編髮

編音步
典反

隨畜移

徙亡常處亡君長地方可數千里自僞以東北君長以

十數徙祚都為大

徙及祚都二國也徙後為徙縣屬蜀
郡祚都後為沈黎郡徙音斯祚音材

各反自祚以東北君長以十數冉駹最大

今夔州開州首
領多姓冉者本

皆冉種也
駹音鹿

其俗或土著或移徙在蜀之西自駹以東君

長以十數白馬最大皆氐類也此皆巴蜀西南外蠻夷

也始楚威王時使將軍莊蹻將兵循江上

蹻音居畧反

畧巴

黔中以西

黔中即今黔州是其地本巴人也

莊蹻者楚莊王苗裔也蹻

至滇池方三百里

益州滇池縣其澤在西北澤下流淺狹狀如倒流故曰滇池

旁平

地肥饒數千里以兵威定屬楚欲歸報會秦擊奪楚巴

黔中郡道塞不通因乃以其衆王滇變服從其俗以長

之秦時嘗破畧通五尺道

其處險阨故道才通五尺

諸此國頗置吏

馬十餘歲秦滅及漢興皆棄此國而關蜀故徼

西南之徼猶北

方塞也徽
音工釣反

巴蜀民或竊出商賈取其祚馬犍僮旄牛以

此巴蜀殷富建元六年大行王恢擊東粵東粵殺王郢

以報恢因兵威使番陽令

番音婆

唐蒙風曉南粵

風音諷

南

粵食蒙枸醬

枸音矩子形如桑椹緣木而生味辛蜀人取其實為醬以為珍味也食音嗣

蒙

問所從來曰道西北牂柯江江廣數里出番禺城下

番禺音

番禺音愚

蒙歸至長安問蜀賈人獨蜀出枸醬多持竊出市

夜郎夜郎者臨牂柯江江廣百餘步足以行船南粵以

財物役屬夜郎西至桐師然亦不能臣使也蒙上書說

上曰南粵王黃屋左纛地東西萬餘里名為外臣實一
州主今以長沙豫章往水道多絕難行竊聞夜郎所有
精兵可得十萬浮船牂柯出不意此制粵一奇也誠以
漢之彊巴蜀之饒通夜郎道為置吏甚易上許之乃拜
蒙中郎將將千人食重萬餘人從巴苻闕入遂見夜郎
侯多同多同其侯名也厚賜諭以威德約為置吏使其子為令
比之於漢縣也夜郎旁小邑皆貪漢繒帛以為漢道險終不能
有也乃且聽蒙約還報乃以為犍為郡發巴蜀卒治道

自棘道指牂柯江蜀人司馬相如亦言西夷邛笮可置
郡使相如以中郎將往諭皆如南夷為置一都尉十餘
縣屬蜀當是時巴蜀四郡通西南夷道載轉相饟數歲
道不通士罷餓離暑溼死者甚衆西南夷又數反發
兵興擊耗費亡功上患之使公孫宏往問視焉還報言
其不便及宏為御史大夫時方築朔方據河逐胡宏等
因言西南夷為害可且罷專力事匈奴上許之罷西夷
獨置南夷兩縣一都尉稍令犍為自保就及元狩元年

博望侯張騫言使大夏時見蜀布邛竹杖問所從來曰
從東南身毒國可數千里得蜀賈人市或聞邛西可二
千里有身毒國騫因盛言大夏在漢西南慕中國患匈
奴隔其道誠通蜀身毒國道便近又亡害於是天子乃
令王然于柏始昌呂越人等十餘輩間出西南夷指求
身毒國至滇滇王當羗乃留為求道四歲餘皆閉昆明
莫能通滇王與漢使言漢孰與我大及夜郎侯亦然各
自以一州王不知漢廣大使者還因盛言滇大國足事

親附天子注意焉及至南粵反上使馳義侯因獫為發

南夷兵且蘭君

且子餘反

恐遠行旁國虜其老弱乃與其衆

反殺使者及獫為太守漢乃發巴蜀罪人當擊南粵者

八校尉擊之會越已破漢八校尉不下中郎郭昌衛廣

引兵還行誅隔滇道者且蘭斬首數萬遂平南夷為牂

柯郡夜郎始倚南粵南粵已滅還誅反者夜郎遂入朝

上以為夜郎王南粵破後及漢誅且蘭邛君并殺笮侯

冉駹皆震恐請臣置吏以邛都為粵儋郡笮都為沈黎

郡冉駹為文山郡廣漢西白馬為武都郡使王然于以
粵破及誅南夷兵威風諭滇王入朝滇王者其衆數萬
人其旁東北勞深靡莫皆百姓相杖不肯聽勞莫數侵
犯使者吏卒元封二年天子發巴蜀兵擊滅勞深靡莫
以兵臨滇滇王始首善以故弗誅滇王離西夷舉國降
離西夷謂
東嚮事漢請置吏入朝於是以為益州郡賜滇王王復
長其民西南夷君長以百數獨夜郎滇受王印滇小邑
也最寵焉後二十三歲孝昭始元元年益州廉頭姑繒

民反殺長吏牂柯談指同並等二十四邑凡三萬餘人

皆反

反並音伴

遣水衡都尉發蜀郡犍為犇命萬餘人擊牂

柯大破之後二歲姑繒葉榆復反遣水衡都尉呂辟胡

將郡兵擊之辟胡不進蠻夷遂殺益州太守乘勝與辟

胡戰士戰及溺死者四千餘人明年復遣軍正王平與

大鴻臚田廣明等並進大破益州斬首捕虜五萬餘級

獲畜產十餘萬上曰鈞町侯亡波率其邑君長人民擊

反者

鈞音勛町音定

斬首捕虜有功其立亡波為鈞町王大鴻

臚廣明賜爵關內侯食邑三百戶後間歲武都氏人反

遣執金吾馬適建龍頤侯韓增與大鴻臚廣明將兵擊

之至成帝河平中夜郎王興與鈞町王禹漏卧侯俞

漏卧

夷邑名後為縣俞音踰

更舉兵相攻牂柯太守請發兵誅興等議

者以為道遠不可擊乃遣太中大夫蜀郡張匡持節和

解興等不從命刻木象漢吏立道旁射之杜欽說大將

軍王鳳曰太中大夫匡使和解蠻夷王侯王侯受詔已

復相攻輕易漢使不憚國威其効可見恐議者選更復

守和解

選更怯不前之意也選音息充反與音人充反

太守察動靜有變乃以

聞如此則復曠一時王侯得收獵其衆申固其謀黨助

衆多各不勝忿必相殄滅自知罪成狂犯守尉

言起狂悖殺守尉

尉也遠歲溫暑毒草之地雖有孫吳將賁育士若入水火

往必焦沒知勇亡所施屯田守之費不可勝量宜因其

罪惡未成未疑漢家加誅陰勅旁郡守尉練士馬大司

農豫調穀積要害處選任職太守往以秋涼時入誅其

王侯尤不軌者即以為不毛之地亡用之民聖王不以

勞中國宜罷郡放棄其民絕其王侯勿復通如以先帝

所立累世之功不可墮壞亦宜因其萌芽早斷絕之及

已成形然後戰師則萬姓被害大將軍鳳於是薦金城

司馬陳立拜為牂柯太守立者臨邛人前為連然長不

韋令

皆益州縣也

蠻夷畏之及至牂柯諭告夜郎王興興不

從命立請誅之未報乃從吏數十人出行縣

行音下更反

至

興國且同亭

且音子余反

召興興將數千人往至亭從邑君

數十人入見立立數責因斷頭

數音所具反

邑君曰將軍誅

亡狀為民除害願出曉士眾以興頭示之皆釋兵降鉤
町王禹漏卧侯俞震恐入粟千斛牛羊勞吏士立還歸
郡興妻父翁指與興子邪務收餘兵迫脅旁二十二邑
反至冬立奏募諸夷與都尉長史分將攻翁指等翁指
據院為壘立使奇兵絕其饟道縱反間以誘其眾都尉
萬年曰兵久不決費不可共共讀引兵獨進敗走趨立
營立怒叱戲下令格之都尉復還戰立引兵救之時天
大旱立攻絕其水道蠻夷共斬翁指持首出降立已平

定西夷徵詣京師會巴郡有盜賊復以立為巴郡太守
秩中二千石居賜爵左庶長徙為天水太守勸民農桑
為天下最賜金四十斤入為左曹衛將軍護軍都尉卒

官王莽篡位改漢制貶鈞町王以為侯王邯怨恨

邯其王名

也邯音酣 牂柯大尹周欽詐殺邯邯弟承攻殺欽州郡擊之

不能服三邊蠻夷愁擾盡反復殺益州大尹程隆莽遣
平蠻將軍馮茂發巴蜀犍為吏士賦斂取足於民以擊
益州出入三年疾疫死者什七巴蜀騷動莽徵茂還誅

之更遣寧始將軍廉丹與庸部牧史熊

并改益州為庸部

大發

天水隴西騎士廣漢巴蜀犍為吏民十萬人轉輸者合

二十萬人擊之始至頗斬首數千其後軍糧前後不相

及士卒饑疫三歲餘死者數萬而粵舊蠻夷任貴亦殺

太守枚根自立為邛穀王

枚根太守之姓名

會莽敗漢興誅貴

復其舊號建武以後西南夷夜郎滇地邛笮冉駹諸國

悉皆臣屬如先漢時又有哀牢焦僥禪國諸夷自昔不

通中國者亦奉職貢有以見漢德之大也其在隋世則

復有所謂附國者距蜀都西北二千餘里大業中遣使入貢蓋亦西南夷云

夜郎

夜郎漢時通焉初夜郎有女子浣於遯水有三節大竹流入足間聞其中有號聲剖竹視之得一男兒歸而養之及長有才武自立為夜郎侯以竹為姓武帝元鼎六年平南夷為牂柯郡夜郎侯迎降賜其王印綬後遂殺之夷獠咸以竹王非血氣所生甚重之求為立後牂柯

太守吳霸以聞天子乃封其三子為侯死配食其父今

夜郎縣有竹王三郎神是也

前書地理志曰夜郎有邛水東至廣鬱華陽國志云

邛水通鬱林有三郎祠皆有靈響又云竹王所捐破竹於野成竹林今王祠有竹林是也王嘗從人止大石上令作羹從者白無水王以劍擊石出水今竹王水是也按漢書夜郎侯降封王不言殺之至成帝時猶謂之夜郎王獨范史云竹王被殺後封其子為侯與班氏牴牾今兩存之

初楚頃襄王之時遣

將莊豪從沅水伐夜郎軍至且蘭牂船於岸而步戰既

滅夜郎因留王滇池以且蘭有牂船牂柯處乃改其名

為牂柯

牂柯繫船杙也按史記及漢書皆云楚威王時使莊驕畧巴黔以西至滇池欲歸會秦奪楚巴

黔中郡因其衆王滇後十餘歲秦滅又按楚自威王後懷王立三十年至頃襄王之二十二年秦昭襄王遣兵攻楚取巫黔中郡地後漢史則云頃襄王時莊豪王滇豪即躋也若莊躋自威王時將兵畧地屬秦臨巫黔中郡道塞不通凡經五十二年豈得如此淹久或恐史記誤謬班固循習而書范曄所記詳考為正又按莊躋王滇後十五年頃襄王卒考烈王立二十五年幽王立十年王負芻立五年而楚滅後十五年而秦亡凡七十年何故云躋之王滇後十餘歲而狎柯地多雨潦俗好秦亡斯又未之詳也躋音渠畧反

巫鬼禁忌寡畜產又無蠶桑故其郡最貧鈎町縣有桄

榔木可以為麪百姓資之

臨海異物志曰桄榔外皮有毛似拼欄而散生其木剛作

鋸鋤利如鐵中石更利惟中焦根乃致敗耳皮中有似擣稻米片又似麥麪中作餅餌廣志曰桄榔樹大四五

圍長五六丈洪直旁無枝條其顛生葉不過數十似樓葉破其木肌堅難傷入數寸得麪赤黃蜜綴可食也

公孫述時大姓龍傳尹董氏與郡功曹謝暹保境為漢乃遣使從番禺江奉貢光武嘉之並加褒賞桓帝時郡人尹珍自以生於荒裔不知禮義乃從汝南許慎應奉受經書圖緯學成還鄉里教授於是南域始有學焉珍官至荊州刺史

尹珍字道真母歛縣人也

滇國

滇王者莊蹻之後也元封三年武帝平之以其地為益

州郡割牂柯越雋各數縣配之後數年復并昆明地皆以屬之此郡有池周回二百餘里水源深廣而末更淺狹有似倒流故謂之滇池河土平敞多出鸚鵡孔雀有鹽池田漁之饒金銀畜產之富人俗豪怵怵奢侈也居官者皆富及累世及王莽政亂益州郡夷棟蠹若豆等起兵殺郡守越雋姑復夷人大牟亦皆叛殺畧吏民莽遣寧始將軍廉丹發巴蜀吏民及轉兵穀卒徒十餘萬擊之吏士饑疫連年不能尅而還以廣漢文齊為太守造起

波池開通灌溉墾田二千餘頃率厲兵馬修障塞降集
羣夷甚得其和及公孫述據益州文齊固守拒險述拘
其妻子許以封侯齊終不降聞光武即位乃間道遣使
自聞蜀平徵為鎮遠將軍封成義侯於道卒詔為起祠
堂郡人立廟祀之建武十八年夷渠帥棟蠡與姑復櫟
榆橋棟連然滇池建伶昆明諸種反叛殺長吏益州太
守繁勝與戰而敗退保朱提縣屬犍為郡朱
音殊提音匙十九年遣
武威將軍劉尚等發廣漢犍為蜀郡人及朱提夷合萬

三千人擊之尚軍遂渡瀘水入益州界

瀘水一名若水出旄牛徼外經

朱提至焚道入江在今嵩州南特有瘴氣三月四月經之必死五月以後行者得無害故諸葛亮表云五月渡

瀘言其艱苦也

羣夷聞大兵至皆棄壘奔走尚獲其羸弱穀畜

二十年進兵與棟蠡等帥連戰數月皆破之明年四月

追至不韋

孫盛蜀譜曰初秦徙呂不韋子弟宗族於蜀漢武帝開西南夷置郡縣徙呂氏以充之因

置不韋縣華陽國志曰武帝通博南山置不韋縣徙南越相呂嘉宗族實之因名不韋以章其先人惡行也

斬棟蠡帥凡首虜七千餘人得生口五千七百人馬三

千匹牛羊三萬餘頭諸夷悉平肅宗元和中蜀郡王追

為太守政化尤異有神馬四匹出滇池河中甘露降白
烏見始興起學校漸遷其俗靈帝熹平五年諸夷反叛
執太守雍陟遣御史中丞朱龜討之不能尅朝議以為
郡在邊外蠻夷喜叛勞師遠役不如棄之太尉掾巴郡
李顯建策討伐乃拜顯益州太守與刺史龐芝發板楯
蠻擊破平之還得雍陟顯卒後夷人復叛以廣漢景毅
為太守討定之毅有惠政為夷人所懷蜀後主建興二
年丞相諸葛亮率衆南征四郡平之改益州郡為建寧

分建寧永昌為雲南郡又分建寧牂柯為興古郡焉

邛都

邛都夷漢武帝所開以為邛都縣無幾而地陷為汙澤

因名為邛池南人以為邛河

在今嵩州越嵩縣東南南中八郡志曰邛河縱廣岸

二十里深百餘丈多大魚長一二丈頭特大遙視如戴鐵釜狀李膺益州記云邛都縣下有一老姥家貧孤獨每食有小蛇頭上戴角在牀間姥憐而飴之後稍長大遂長丈餘令有駿馬蛇遂吸殺之令因大忿姥限責出蛇姥云在牀下令即掘地愈深愈大而無所見令又遷怒殺姥蛇乃感人以靈言瞋令何殺我母當為母報讐此後每夜輒聞若雷若風四十許日百姓相見咸驚語汝頭那忽戴魚是夜方四十里與城一時俱陷為湖土

人謂之為臨河唯姓字無恙訖今猶存漁人採捕必依止宿每有風浪輒居宅側恬靜無佗風靜水清猶見城郭樓櫓畧然今水淺時彼土人沒水取得舊木堅貞光黑如漆有好事人以為枕相贈畧音測後復反

叛元鼎六年漢兵自越雋水伐之以為越雋郡

雋水源出今雋

州即部縣西南雋山下前書地理志曰言其越雋水以置郡故名焉

其土地平原有稻田

青蛉縣禺同山有碧雞金馬光景時時出現

禺同山在今褒州楊

波縣王褒碧雞頌曰持節使王褒謹拜南崖敬移金精神馬縹碧之雞處南之荒深谿回谷非土之鄉歸來歸來漢德無疆兼乎唐虞澤配三皇華陽國志曰碧雞俗光景人多見之前書音義曰金形似馬碧形似雞也俗

多遊蕩而喜謳歌與祥柯相類豪帥放縱難得制御王

莽時郡守枚根調邛人長貴以為軍候

漢書長貴作任貴

更始

二年長貴率種人攻殺枚根自立為邛穀王領太守事
又降於公孫述述敗光武封長貴為邛穀王建武十四
年長貴遣使上三年計天子即授越雋太守印綬十九
年武威將軍劉尚擊益州夷路由越雋長貴聞之疑尚
既定南邊威法必行已不得自放縱即聚兵起營臺招
呼諸君長多釀毒酒欲先以勞軍因襲擊尚尚知其謀
即分兵先據邛都遂掩長貴誅之徙其家屬於成都永

平元年姑復夷復叛益州刺史發兵討之斬其渠帥傳首京師後太守巴郡張翕政化清平得夷人和在郡十

七年卒夷人愛慕如喪父母蘇祈叟二百餘人

蘇祈縣屬越雋

郡齋牛羊送喪至翕本縣安漢

安漢縣屬巴郡

起墳祭祀詔書

嘉美為立祠堂安帝元初三年郡徼外夷大羊等八種

戶三萬一千口十六萬七千六百二十慕義內屬時郡

縣賦斂煩數五年以卷夷大牛種封離等反畔殺遂久

令

遂久故縣在今靡州界

明年永昌益州及蜀郡夷皆叛應之眾

遂十餘萬破壞二十餘縣殺長吏燔燒邑郭剽掠百姓骸骨委積千里無人詔益州刺史張喬選堪能從事討之喬乃遣從事楊竦將兵至櫟榆擊之賊盛未敢進先以詔書告示三郡密徵求武士重其購賞乃進軍與封離等戰大破之斬首三萬餘級獲生口五百人資財四千餘萬悉以賞軍士封離等惶怖斬其同謀渠帥詣竦乞降竦厚加慰納其餘三十六種皆來降附竦因奏長吏姦猾侵犯蠻夷者九十人皆減死州中論功未及上

會竦病創卒張喬深痛惜之乃刻石勒銘圖畫其像天子以張翕有遺愛乃拜其子湍為太守夷人懽喜奉迎道路曰郎君儀貌類我府君後湍頗失衆心有欲叛者諸夷耆老相曉語曰當為先府君故遂以得安後順桓間廣漢馮顥為太守尤多異迹云

祚都

祚都夷者漢孝武帝所開以為祚都縣其人皆被髮左衽言語多好譬類居處略與汶山夷同土出長年神藥

仙人山圖所居焉

劉向神仙傳曰山圖隴西人好乘馬馬躅折脚山中道士教服地黃當歸

羌活元參服一年不嗜食病愈身輕追道士問之自云五岳使我之名山採藥能隨吾汝便不死山圖追隨人不復見六十餘年一旦歸來行母服於冢間暮年復去莫知所之也元鼎六年以為沈黎

郡至天漢四年并蜀為西部置兩都尉一居旄牛主徼

外夷一居青衣主漢人永平中益州刺史梁國朱輔好

立功名慷慨有大畧在州數歲宣示漢德威懷遠夷自

汶山以西前世所不至正朔所未知白狼槃木唐菎等

百餘國戶百三十餘萬口六百萬以上舉種奉貢稱為

臣僕輔上疏曰臣聞詩云彼徂矣岐有夷之行傳曰岐道雖僻而人不遠詩人誦詠以為符驗今白狼王唐叢

等慕化歸義作詩三章路經邛來大山零高坂

山海經曰崦嵫山

江水出焉郭璞曰中江所出也華陽國志曰邛來山本名邛笮故邛人笮人界也巖阻峻回曲折乃至山上凝冰夏結冬則劇寒王陽行部至此而退者也峭危峻險有長貧若採八渡之難陽母閣峻並坂名

百倍岐道襁負老幼若歸慈母遠夷之語辭意難正草

木異種鳥獸殊類有犍為郡掾田恭與之習狎頗曉其言輒令訊其風俗譯其辭語今遣從事史李陵與恭護

送詣闕并上其樂詩昔在聖帝舞四夷之樂今之所上

庶備其一帝嘉之事下史官錄其歌焉

東觀記載其歌并重譯訓詁為

華言今范史所載者是也今錄東觀夷語以為此注

遠夷樂德歌詩云大漢是治

提宮隗構

與天合意

魏冒踰槽

吏譯平端

閩譯劉脾

不從我來

旁草支留

聞

風向化

徵衣隨旅

所見奇異

知唐桑父

多賜繒布

邪毗堪繡

甘美酒食

推潭僕遠

昌樂肉飛

拓拒蘇便

屈申悉備

局後仍離

蠻夷貧薄

儂讓龍洞

無

所報嗣

莫支度由

願主長壽

陽維僧鱗

子孫昌熾

莫穉角存

遠夷慕德

歌詩曰蠻夷所處

屢讓被尼

日入之部

且交陵悟

慕義向化

繩動隨旅

歸日出主

歸且使維

聖德深恩

聖德渡諾

與人富厚

魏苗度洗

冬多霜

雪

綜邪流藩

夏多和雨

祚邪尋螺

寒溫時適

藐潯瀟灘

部人多有

苗補邪推

涉危歷險

辟危歸險

不遠萬里

莫受萬柳

去俗歸德

街壘附德

心歸慈

母

仍路尊摸

遠夷懷德歌曰荒服之外

荒服之儀

土地磽确

黎籍憐憐

食肉衣皮

阻蘇邪犁

不見鹽穀

莫碭麤水

吏譯傳風

周譯傳微

大漢安

樂

是漢夜拒

攜負歸仁

蹤優路仁

觸冒險陝

雷折險龍

高山岐峻

倫狼歲墮

緣崖磻石

扶路側祿

木薄發家

息落服淫

百宿到洛

理灑毳雒

父子同

賜

捕蒞菌毗

懷抱匹帛

懷稟匹漏

傳告種人

傳室呼勅

長願臣僕

陵陽臣僕

肅宗初輔坐事免是時郡尉府舍皆有雕飾畫山神海
靈奇禽異獸以眩耀之夷人益畏憚焉和帝永元十二
年旄牛徼外白狼樓薄蠻夷王唐繒等遂率種人十七
萬口歸義內屬詔賜金印紫綬小豪錢帛各有差安帝
永初元年蜀郡三襄種夷與徼外汙衍種并兵三千餘
人反叛攻蠡陵城殺長吏二年青衣道夷邑長令田今姓
名與徼外三種夷三十一萬口齎黃金旄牛眊顧野王曰眊結
毛為飾也即今馬及弓槩上纓眊也舉土內屬安帝增令田爵號為奉通

邑君延光二年春旄牛夷叛攻零關

郡國志零關道屬越雋郡

殺長

吏益州刺史張喬與西部都尉擊破之於是分置蜀郡屬國都尉領四縣如太守桓帝永壽二年蜀郡夷叛殺畧吏民延熹二年蜀郡三襄夷寇犛陵殺長吏四年犍為屬國夷寇郡界益州刺史山昱擊破之斬首千四百級餘皆解散靈帝時以蜀郡屬國為漢嘉郡

冉駹

冉駹夷漢武帝所開元鼎六年以為汶山郡至地節三

年夷人以立郡賦重宣帝乃省并蜀郡為北部都尉其
山有六夷七羗九氏各有部落其王侯頗知文書而法
嚴重貴婦人黨母族死則燒其尸土氣多寒在盛夏冰
猶不釋故夷人冬則避寒入蜀為傭夏則違暑反其邑
衆皆依山居止累石為室高者至十餘丈為邛籠

紫今
彼土

夷人呼
為邛也

又土地剛鹵不生穀粟麻菽唯以麥為資而宜

畜牧有旄牛無角一名童牛肉重千斤毛可為毼出名

馬有靈羊可療毒

本草經曰零羊角味鹹無毒主療青
盲蟲毒去惡鬼安心氣彊筋骨也

又有食藥鹿鹿麋有胎者其腸中糞亦療毒疾又有五

角羊麝香輕毛騃雞牲牲

郭璞注山海經曰騃雞似雉而大青色有毛角鬬敵死乃

止其人能作旄氈班罽青頓髦毼羊羖之屬

青頓髦羖並未詳字

書無此二字周書伊尹為四方獻令曰正西昆侖狗國鬼親枳已闕耳貫胸雕題離邱漆齒請令以丹青白旄純罽龍角神龜為獻湯曰善何承天纂文曰純氈罽也音卑疑反髦即純也特多雜藥地有

鹹土煮以為鹽麝羊牛馬食之皆肥

麝即麝狼也異物志狀似鹿而角觸

前向人林樹掛角故常在平淺草中肉肥脆香美遂入林則搏之皮可作履襪角正四據南人因為牀音子

反今其西又有三河槃于虜北有黃石北地盧水胡其表

乃為徼外靈帝時復分蜀郡北部為汶山郡蜀後主建興十年汶山平康夷反姜維討破之

哀牢夷

揮國及僂
僂夷並附

哀牢夷後漢時通焉其先有婦人名沙壹居于牢山嘗捕魚水中觸沈木若有感因懷姙十月產子男十人後沈木化為龍出水上沙壹忽聞龍語曰若為我生子今悉何在九子見龍驚走獨小子不能去背龍而坐龍因舐之其母鳥語謂背為九謂坐為隆因名子曰九隆及

後長大諸兄以九隆能為父所舐而黥遂共推以為王
後牢山下有一夫二婦復生十女子九隆兄弟皆娶以
為妻後漸相滋長種人皆刻畫其身象龍文衣著尾九

隆死世世相繼

哀牢傳曰九隆代代相傳不可得數至於禁高乃可記知禁高死子吸代吸死

子達非代達非死子哀牢代哀牢死子桑藕代桑藕死子柳承代柳承死子柳貌代柳貌死子扈栗代乃

分置小王往往邑居散在谿谷絕域荒外建武二十五

年其王賢栗遣兵乘箬船

箬音排縛竹木為箬以常船

南下江漢擊

附塞夷鹿多

音多

鹿多人弱為所禽獲於是震雷疾雨南

風飄起水為逆流翻涌二百餘里簞船沈沒哀牢之衆溺死數千人賢栗復遣其六王將萬人以攻鹿多鹿多王與戰殺其六王哀牢耆老共埋六王夜虎復出其尸而食之餘衆驚怖引去賢栗惶恐謂其耆老曰我曹入邊塞自古有之今攻鹿多輒被天誅中國其有聖帝乎天祐助之何其明也二十七年賢栗等遂率種人戶二千七百七十口萬七千六百五十九詣越雋太守鄭鴻降求內屬光武封賢栗等為君長自是歲來朝貢永平

十二年哀牢王柳貌遣子率種人內屬其稱邑王者七十二人戶五萬一千八百九十口五十五萬三千七百一十一西南去洛陽七千里顯宗以其地置哀牢博南

二縣割益州郡西部都尉可領六縣

古今注曰永平十年置益州西部都

尉居舊唐續漢志六縣謂不韋舊唐比蘇標榆邪龍雲南也

合為永昌郡始通博南

山度蘭倉水

華陽國志曰博南縣西山高三十里越之渡蘭倉水也

行者苦之歌

曰漢德廣開不賓度博南越蘭津度蘭倉為他人哀牢皆穿鼻儋耳其渠帥自謂王者耳皆下肩三寸庶人則

至肩而已土地沃美宜五穀蠶桑知染采文繡罽毼帛

疊

杜薄傳云其國女子織作白疊花布

蘭干細布

華陽國志曰蘭干獠言紵

織成文章

如綾錦有梧桐木華績以為布

廣志曰梧桐有白者剝國有桐木其花木白毳

取其毳淹漬緝織以為布也

幅廣五尺絜白不受垢汙先以覆亡人

然後服之其竹節相去一丈名曰濮竹出銅鐵鉛錫金

銀光珠

華陽國志曰蘭倉水有金沙洗取融為金有光珠穴博物志曰光珠即江珠也

虎魄水

精瑠璃軻蟲蚌珠孔雀翡翠犀象猩猩豹獸

鄒道元水經注曰猩猩

猩形若狗而人而頭顏端正善與人言音聲妙麗如婦人對語聞之無不酸楚南中志曰猩猩在山谷中行無

常語百數為羣土人以酒若糟設於路又喜屬子土人
織草為屨數十兩相連結猩猩在山谷見酒及屨知其
設張者即知張者先祖名字乃呼其名而罵云奴欲張
我捨之而去去而又還相呼試共嘗酒初嘗少許又取
屬子著之若進酒三升便大醉人出收之屬子相連不
得去執還內牢土人欲取者到牢邊語云猩猩汝可自
相推肥者出之既擇竟相對而泣即左思賦云猩猩啼
而就禽者也昔有人以猩猩餉封溪令令問餉何物猩
猩自於籠中曰但有酒及僕耳無他飲食南中八郡志
曰貂大如驢狀頗似熊多力食鐵所觸無不拉廣志曰
貂色蒼白其皮溫暖雲南縣有神鹿兩頭能食毒草先是西部都

尉廣漢鄭純為政清潔化行夷貊君長感慕皆獻土珍
頌德美天子嘉之即以為永昌太守純與哀牢夷人約

邑豪歲輸布貫頭衣二領鹽一斛以為常賦夷俗安之
純自為都尉太守十年卒官建初元年哀牢王類牢與
守令忿爭遂殺守令而反叛攻越雋唐城太守王尋奔
牂榆哀牢三千餘人攻博南燔燒民舍肅宗募發越雋
益州永昌夷漢九千人討之明年春邪龍縣邪龍縣屬永昌昆
明夷鹵承等應募率種人與諸部兵擊類牢於博南大
破斬之傳首洛陽賜鹵承帛萬匹封為破虜傍邑侯永
元六年郡徼外敦忍乙王莫延慕義遣使譯獻犀牛大

象九年徼外蠻及撣國王雍由調

撣音撞東觀作撞字

遣重譯奉

國珍寶和帝賜金印紫綬小君長皆加印綬錢帛永初

元年徼外焦僥種夷陸類等三千餘口舉種內附獻象

牙水牛封牛永寧元年撣國王雍由調復遣使者詣闕

朝賀獻樂及幻人能變化吐火自支解易牛馬頭又善

跳丸數乃至千自言我海西人海西即大秦也撣國西

南通大秦明年元會安帝作樂於庭封雍由調為漢大

都尉賜印綬金銀綵繒各有差也

附國

附國隋時通焉在蜀郡西北二千餘里即漢之西南夷
也有嘉良夷即其東部所居種姓自相率領土俗與附
國同言語少殊不能統一其人並無姓氏附國王字宜
紺其國南北八百里東西千五百里無城柵近川谷傍
山險俗好復讎故壘石為礪與巢同以避其患其礪高至
十餘丈下至五六丈每級以木隔之基方三四步礪上
方二三步狀似浮圖於下致級開小門從內上通夜必

關閉以防賊盜國有重罪者罰牛人皆輕捷便擊劒漆皮為牟甲弓長六尺竹為箭妻其羣母及嫂兄弟父兄亦納其妻好歌舞鼓簧吹長角有死者無服制置尸高牀之上沐浴衣服以牟甲覆以獸皮子孫不哭帶刀舞劍而呼云我父為鬼所取我欲報冤殺鬼自餘親戚哭三聲而止婦人哭必兩手掩面死家殺牛親屬以腊酒相遺共飲噉而瘞之死後十年方始大葬必集親賓殺馬動至數十匹立木為祖父神而事之其俗以皮為帽

形圓如鉢或戴罽毼衣多毼皮裘全剝牛脚皮為靴項
繫鐵鎖手貫鐵釧王與酋帥金為首飾胸前縣一金花
徑三寸其土高氣候涼多風少雨土宜小麥青稞山出
金銀銅多白雉水有嘉魚長四尺而鱗細大業四年其
王遣使素福等八人入朝明年又遣其弟子宜林率嘉
良夷六十人朝貢欲獻良馬以路險不通請開山道修
職貢物煬帝以勞民不許嘉良有水濶六七十丈附國
有水濶百餘丈並南流用皮為舟而濟附國有薄緣夷

風俗亦同西有女國其東北連山縣亘數千里接於党
項往往有羗大小左封昔衛葛延白狗向人望族林臺
春桑利豆迷桑婢藥大硤白蘭北利摸徒那鄂當迷渠
步禁悟千硤並在深山窮谷無大君長其風俗略同於
党項或役屬吐谷渾或附國大業中朝貢緣西南邊置
諸道總管以管之

通志卷一百九十七

欽定四庫全書

史部

通志卷一百九十八

詳校官編修_臣李潢

編修_臣裴謙覆勘

覆校官助教_臣金學詩

校對官主事_臣李駿

謄錄舉人_臣任銜葵

欽定四庫全書

通志卷一百九十八

宋右迪功郎鄭樵漁仲撰

四夷傳第五

南蠻下

嶺南序畧 南粵 海南序畧 黃支 哥羅

林邑 扶南 頓遜 毗騫 干陀利 狼牙修

婆利 槃槃 赤土 真臘 羅刹 投和

丹丹邊斗杜薄薄刺敦焚火山無

論

嶺南序畧

五嶺之南漲海之北三代以前是為荒服常周成王時
周公居攝六年制禮作樂天下和平南荒有越裳國以
三象重譯而獻白雉曰道路悠遠山川阻深音使不通
故重譯而朝成王以歸周公公曰德不加焉則君子不
饗其質政不施焉則君子不臣其人吾何以獲此賜也

其使請曰吾受命吾國之黃耆曰久矣天之無烈風雷雨意者中國有聖人乎有則曷往朝之周公乃歸之於王稱先王之神致以薦于宗廟周德既衰於是稍絕及楚子稱霸朝貢百粵秦并天下威服蠻夷始開嶺外置南海桂林象郡漢興尉佗自立為南粵王傳國五世至武帝元鼎五年遂滅之以其地為儋耳珠崖南海蒼梧鬱林合浦交趾九真日南九郡置刺史治交趾郡領焉交趾者禮稱南方曰蠻雕題交趾是也

題額也雕題謂刻其額以丹青

之涅交趾之西有噉人國生首子輒解而食之謂之宜弟

味旨則以遺其君君喜而賞其父取妻美則讓其兄今

烏潯人實然

萬震南州異物志曰烏潯在廣州之南交趾之北其土人恒出道間伺候行旅輒出

擊之利得人食之不貪其財貨並以其肉為肴俎又取其髑髏破之以飲酒以人掌趾為珍異以食老也其

珠崖儋耳二郡在海洲上東西千里南北五百里其渠

帥貴長耳皆穿而緹之垂肩三寸武帝末珠崖太守會

稽孫幸調廣幅布獻之蠻不堪役遂攻郡殺幸幸子豹

合率善人還復破之自領郡事討擊餘黨連年乃平制

詔即以豹為珠崖太守威政大行獻命歲至然中國貪其珍賂漸相侵侮故率歲一反元帝初元三年遂罷之凡立郡六十五歲逮王莽輔政元始二年日南之南黃支國來獻犀牛凡交趾所統雖置郡縣而言語重譯乃通人如禽獸長幼無別項髻徒跣為髻於項上也以布貫耳而著之後頗徙中國罪人使雜居其間乃稍知言語漸見禮化光武中興錫光為交趾任延守九真於是教其耕稼制為冠履初設媒聘始知姻娶建立學校導之禮義

建武十二年九真徼外蠻里張游

里蠻之別號今呼為俚人

率種人

募化內屬封為歸漢里君明年南粵徼外蠻夷獻白雉

白兔至十六年交趾女子徵側及其妹徵貳反攻郡徵

側者麓泠縣雒將之女也

麓音莫支反泠音零

嫁為朱雋

音馬人詩

索妻甚雄勇交趾太守蘇定以法繩之側忿故反於是

九真日南合浦蠻里皆應之凡畧六十五城自立為王

交趾刺史及諸太守僅得自守光武乃詔長沙合浦交

趾具車船修道橋通障谿儲糧穀十八年遣伏波將軍

馬援樓船將軍段志發長沙桂陽零陵蒼梧兵萬餘人
討之明年夏四月援破交趾斬徵側徵貳等餘皆降散
進擊九真賊都陽等破降之徙其渠帥三百餘口於零
陵於是嶺表悉平肅宗元和元年日南徼外蠻夷究不
事人

究不事人蠻夷別號也

邑豪獻生犀白雉和帝永元十二年

夏四月日南象林蠻夷二千餘人寇掠百姓燔燒官寺
郡縣發兵討擊斬其渠帥餘衆乃降於是置象林將兵
長史以防其患安帝永初元年九真徼外夜郎蠻夷舉

土內屬開境千八百四十里元初二年蒼梧蠻夷反叛
明年遂招誘鬱林合浦蠻漢數千人攻蒼梧郡鄧太后
遣侍御史任連連音卓奉詔赦之賊皆降散延光元年九

真徼外蠻貢獻內屬三年日南徼外蠻復來內屬順帝
永建六年日南徼外葉調王便遣使貢獻帝賜調便金
印紫綬永和三年日南象林徼外蠻夷區憐等數千人
攻象林縣燒城寺殺長史交趾刺史樊演發交趾九真
二郡兵萬餘人救之兵士憚遠役遂反攻其府二郡雖

擊破反者而賊勢轉盛會侍御史賈昌使在日南即與
州郡并力討之不利遂為所攻圍歲餘而兵穀不繼帝
以為憂明年召公卿百官及四府掾屬問其方畧皆議
遣大將發荊揚兗豫四萬人赴之大將軍從事中郎李
固駁曰若荊揚無事發之可也今二州盜賊槃結不散
武陵南郡蠻夷未輯長沙桂陽數被徵發如復擾動必
更生患其不可一也又兗豫之人卒被徵發遠赴萬里
無有還期詔書迫促必致叛亡其不可二也南州水土

溫暑加有瘴氣致死亡者十必四五其不可三也遠涉
萬里士卒疲勞比至嶺南不復堪關其不可四也軍行
三十里為程而去日南九千餘里三百日乃到計人稟
五升

古升小故
曰五升也

用米六十萬斛不計將吏驢馬之食但

負甲自致費便若此其不可五也設軍到所在死亡必
衆既不足禦敵當復更發此為刻割心腹以補四支其
不可六也九真日南相去千里發其吏民猶尚不堪况
乃苦四州之卒以赴萬里之艱哉其不可七也前中郎

將尹就討益州叛羗益州諺曰虜來尚可尹來殺我後
就徵還以兵付刺史張喬喬因其將吏旬月之間破殄
寇虜此發將無益之效州郡可任之驗也宜更選有勇
畧仁惠任將帥者以為刺史太守悉使共住交趾今日
南兵單無穀守既不可戰又不能可一切徙其吏民北
依交趾事靜之後乃命歸本還募蠻夷使自相攻轉輸
金帛以為其資有能反間致頭首者許以封侯列土之
賞故并州刺史長沙祝良性多勇決又南陽張喬前在

益州有破虜之功皆可任用昔太宗就加魏尚為雲中
守哀帝即拜龔舍為太山太守宜即拜良等使道之官
四府悉從固議即拜祝良為九真太守張喬為交趾刺
史喬至開示慰誘並皆降散良到九真單車入賊中施
設方畧招以威信降者數萬人皆為良築起府寺由是
嶺外復平建康元年日南蠻夷千餘人復攻燒縣邑遂
扇動九真與相連結交趾刺史九江夏方開恩招誘賊
皆降服時梁太后臨朝美方之功遷為桂陽太守桓帝

永壽三年居風令貪暴無度縣人朱達等及蠻夷相聚
攻殺縣令衆至四五千人進攻九真九真太守兒式戰
死

兒音五
奚反

詔賜錢六十萬拜子二人為郎遣九真都尉

魏朗討破之斬首二千級渠帥屯據日南衆轉彊盛延
熹三年詔復拜夏方為交趾刺史方威惠素著日南宿
賊聞之二萬餘人相率詣方降靈帝建寧三年鬱林太
守谷永以恩信招降烏潯人十餘萬內屬皆受冠帶開
置七縣熹平二年冬十二月日南徼外國重譯貢獻光

和元年交趾合浦烏許蠻反叛招誘九真日南合數萬人攻沒郡縣四年刺史朱雋擊破之六年日南徼外國復來貢獻自是以後或臣或畔壤地廣遠竟難馴服焉

南粵

南粵王趙佗真定人也

佗音徒何反

秦并天下畧定揚粵置

桂林南海象郡以適徙民與粵雜處十三載至二世時南海尉任囂病且死召龍川令趙佗語曰聞陳勝等作亂豪傑叛秦相立南海辟遠恐盜兵侵此吾欲興兵絕

新道自備待諸侯變會疾甚且番禺負山險阻南北東西數千里頗有中國人相輔此亦一州之主可為國郡中長吏無足與謀者故召公告之即被佗書行南海尉事竄死佗即移檄告橫浦陽山湟谿關曰盜兵且至急絕道聚兵自守因稍以法誅秦所置吏以其黨為守假秦已滅佗即擊并桂林象郡自立為南粵武王高帝已定天下為中國勞苦故釋佗不誅十一年遣陸賈立佗為南粵王與剖符通使使和輯百粵毋為南邊害與長

沙接境高后時有司請禁粵關市鐵器佗曰高皇帝立
我通使物今高后聽讒臣別異蠻夷隔絕器物此必長
沙王計欲倚中國擊滅南海并王之自為功也於是佗
乃自尊號為南武帝發兵攻長沙邊敗數縣焉高后遣
將軍隆慮侯竈擊之

周竈也
慮音廬

會暑濕士卒大疫兵不能

踰嶺歲餘高后崩即罷兵佗因此以兵威財物賂遺閩
粵西甌駱役屬焉東西萬餘里廼乘黃屋左纛稱制與
中國侔文帝元年初鎮撫天下使告諸侯四夷從代來

即位意諭盛德焉廼為佗親冢在真定置守邑歲時奉祀召其從昆弟尊官厚賜寵之詔丞相平舉可使粵者平言陸賈先帝時使粵上召賈為太中大夫謁者一人為副使賜佗書曰皇帝謹問南粵王甚苦心勞意朕高皇帝側室之子棄外奉北藩於代道里遼遠壅蔽樸愚未嘗致書高皇帝棄羣臣孝惠皇帝即世高后自臨事不幸有疾日進不衰以故諄暴乎治諸呂為變故亂法不能獨制廼取他姓子為孝惠皇帝嗣賴宗廟之靈功

臣之力誅之已畢朕以王侯吏不釋之故不得不立今
即位乃者聞王遺將軍隆慮侯書求親昆弟請罷長沙
兩將軍朕以王書罷將軍博陽侯親昆弟在真定者已
遣人存問修治先人家前者聞王發兵於邊為寇災不
止當其時長沙苦之南郡尤甚雖王之國庸獨利乎必
多殺士卒傷良將吏寡人之妻孤人之子獨人父母得
一亡十朕不忍為也朕欲定地犬牙相入者以問吏吏
曰高皇帝所以介長沙土也朕不得擅變焉吏曰得王

之地不足以為大得王之財不足以為富服嶺以南王自治之雖然王之號為帝兩帝並立無一乘之使以通其道是爭也爭而不讓仁者不為也願與王分棄前患終今以來通使如故故使賈馳諭告王朕意王亦受之母為寇災矣上褚五十衣中褚三十衣下褚二十衣遺王

以絲裝衣曰褚

願王聽樂娛憂存問鄰國陸賈至佗恐頓首

謝願奉明詔長為藩臣奉貢職於是下令國中曰吾聞兩雄不俱立兩賢不並世漢皇帝賢天子自今以來去

帝制黃屋左纁因為書稱蠻夷大長老夫臣佗昧死再拜上書皇帝陛下老夫故粵吏也高皇帝幸賜臣佗璽以為南粵王使為外臣時內貢職孝惠皇帝即位義不忍絕所以賜老夫者甚厚高后自臨用事近細士信讒臣別異蠻夷出令曰母子蠻夷外粵金鐵田器馬牛羊即予予牡母子牝老夫處辟馬牛羊齒已長自以祭祀不修有死罪使內史藩中尉高御史平凡三輩上書謝過皆不反又風聞老夫父母墳墓已壞削兄弟宗族已

誅論吏相與議曰今內不得振於漢外又亡以自高異
故更號為帝自帝其國非敢有害於天下也高皇后聞
之大怒削去南粵之籍使使不通老夫竊疑長沙王讒
臣故敢發兵以伐其邊且南方卑濕蠻夷中西有西甌
其衆半羸南面稱王東有閩粵其衆數千人亦稱王西
北有長沙其半蠻夷亦稱王老夫故敢妄竊帝號聊以
自娛老夫身定百邑之地東西南北蓋數千里帶甲百
萬有餘然北面而臣事漢何也不敢背先人之故老夫

處粵四十九年於今抱孫焉然夙興夜寐寢不安席食不甘味目不視靡曼之色耳不聽鐘鼓之音者以不得事漢也今陛下幸哀憐復故號通使漢如故老夫死骨不腐改號不敢為帝矣謹北面因使者獻白壁一雙翠

鳥犀角十紫貝五百桂蠹一器

桂蠹桂樹中蝨也漢舊常以薦陵廟

生

翠四十雙孔雀二雙昧死再拜以聞皇帝陛下陸賈還

報文帝大悅遂至孝景時稱臣遣使入朝請

請才性反

然其

居國輒如故號其使天子稱王朝命如諸侯至武帝建

元四年佗孫胡為南粵王立三年閩粵王郢興兵南擊其邊邑粵使人上書曰兩粵俱為藩臣毋擅興兵相攻擊今東粵擅興兵侵臣臣不敢興兵惟天子詔之於是天子多南粵義守職約為興師遣兩將軍往討閩粵兵未踰嶺粵王弟餘善殺郢以降於是罷兵天子使嚴助往諭意南粵王胡頓首曰天子乃興兵誅閩粵死亡以報德遣太子嬰齊入宿衛謂助曰國新被寇使者行矣胡方日夜裝入見天子助去後其大臣諫胡曰漢興兵

誅郢亦行以驚動南粵且先王言事天子期毋失禮要
之不可以怵好語入見入見則不得復歸亡國之勢也
於是胡稱病竟不入見後十餘載胡實病甚太子嬰齊
請歸胡薨謚曰文王嬰齊嗣立即歲其先武帝文帝璽
嬰齊在長安時取邯鄲嫪氏女嫪音居
蚪反生子興及即位
上書請立嫪氏女為后興為嗣漢數使使者風諭嬰齊
猶尚樂擅殺生自恣懼入見要以用漢法比內諸侯固
稱病遂不入見遣子次公入宿衛嬰齊薨謚為明王太

子興嗣立其母為太后太后自未為嬰齊妻時常與霸

陵人安國少季通

姓安國
字少季

及嬰齊薨後元鼎四年漢使

安國少季諭王王太后入朝令辯士諫大夫終軍等宣

其辭勇士魏臣等輔其決衛尉路博德將兵屯桂陽待

使者王年少太后中國人安國少季往復與私通國人

頗知之多不附太后太后恐亂起亦欲倚漢威勸王及

幸臣求內屬即因使者上書請比內諸侯三歲壹朝除

邊關於是天子許之賜其丞相呂嘉銀印及內史中尉

太傅印餘得自置除其故黥劓刑用漢法諸使者留鎮撫之王王太后飭治行裝重資為入朝具相呂嘉年長矣相三王宗族官貴為長吏七十餘人男盡尚王女女盡嫁王子弟宗室及蒼梧秦王有連其居國中甚重粵人信之多為耳目者得衆心愈於王王之上書數諫止王王不聽有畔心數稱病不見漢使者使者注意嘉勢未能誅王王太后亦恐嘉等先事發欲介使者權謀誅嘉等置酒請使者大臣皆侍坐飲嘉弟為將將卒居宮

外酒行太后謂嘉南粵內屬國之利而相君苦不便者何也以激怒使者使者狐疑相杖遂不敢發嘉見耳目非是即趨出太后怒欲鉞嘉以鐵音王止太后嘉遂

出介弟兵就舍稱病不肯見王及使者乃陰謀作亂王素亡意誅嘉嘉知之以故數月不發太后獨欲誅嘉等力又不能天子聞之罪使者怯亡決又以為王王太后已附漢獨呂嘉為亂不足以興兵欲使莊參以二千人往參曰以好往數人足矣以武往二千人亡足以為也

辭不可天子罷參兵邾壯士故濟北相韓千秋奮曰以區區粵又有王應獨呂嘉為害願得勇士三百人必斬嘉以報於是天子遣千秋與王太后弟膠樂將二千人往入粵境呂嘉乃遂反下令國中曰王年少太后中國人又與使者亂專欲內屬又持先王寶入獻天子以自媚多從人行至長安虜賣以為僮奴自脫一時利亡顧趙氏社稷為萬世慮之意乃與其弟將卒攻殺太后王盡殺漢使者遣人告蒼梧秦王及其諸郡縣立明王長

男粵妻子術陽侯建德為王而韓千秋兵之入也破數
小邑其後粵直開道給食未至番禺四十里粵以兵擊
千秋等滅之使人函封漢使節至塞上好為謾辭謝罪
謾音莫連反發兵守要害處於是天子曰韓千秋雖亡成功

亦軍鋒之冠封其子延年為成安侯膠樂其姊為王太
后首願屬漢封其子廣德為襲侯襲古龍字乃赦天下曰天

子微弱諸侯力政譏臣不討賊呂嘉建德等反自立晏
如令粵人及江淮以南樓船十萬師往討之元鼎五年

秋衛尉路博德為伏波將軍出桂陽下湟水主爵都尉楊僕為樓船將軍出豫章下橫浦故歸義粵侯二人為戈船下瀨將軍出零陵或下灘水或抵蒼梧使馳義侯因巴蜀罪人發夜郎兵下牂柯江咸會番禺六年冬樓船將軍將精卒先陷尋陘破石門得粵船粟因推而前挫粵鋒以數萬人待伏波將軍伏波將軍將罪人道遠後期與樓船會乃有千餘人遂俱進樓船居前至番禺建德嘉皆城守樓船自擇便處居東南面伏波居西北

面會暮樓船攻敗粵人縱火燒城粵素聞伏波莫不知其兵多少伏波乃為營遣使招降者賜印綬復縱令相招樓船力攻燒敵反毆而入伏波營中

毆與驅同

遲旦

遲音治

城中皆降伏波呂嘉建德以夜與其屬數百人亡入海伏波又問降者知嘉所之遣人追故其校司馬蘇宏得建德為海常侯粵郎都稽得嘉為臨蔡侯蒼梧王趙光與粵王同姓聞漢兵至降為隨桃侯及粵揭陽令史定降漢為安道侯

揭音羯南海縣

粵將畢取以軍降為滕侯

粵將姓畢

名取也陽音來彫反藤屬南

粵桂林監居翁

桂林部監也
姓居名翁

諭告甌駱

四十餘萬口降為湘城侯戈船下瀨將軍兵及馳義侯
所發夜郎兵未下南粵已平遂以其地為儋耳珠崖南
海蒼梧鬱林合浦交趾九真日南九郡伏波將軍益封
樓船將軍以摧鋒陷堅為將梁侯自尉佗王凡五世九
十三歲而亡

海南序略

海南諸國漢時通焉大抵在交州南及西南居大海中

洲上相去或五三百里五三千里遠者二三萬里乘船
舉帆道里不可詳知外國諸書雖言里數又非定實也
其西與諸胡國接元鼎中遣伏波將軍路博德開百粵
置日南郡其徼外諸國自武帝以來皆獻見後漢桓帝
時大秦天竺皆由此道遣使貢獻及吳孫權遣宣化從
事朱應中郎康泰使諸國其所經及傳聞則有百數十
國因立記傳晉代通中國者蓋尠及宋齊至者有十餘
國自梁武隋煬諸國使至踰於前代唐貞觀以後聲教

遠被舊時所未通者重譯而至又多於梁隋焉其無異聞亦不復更記

黃支

黃支漢時通焉在合浦日南之南三萬里其俗畧與珠崖相類自武帝以來常獻見有明珠玉璧琉璃奇石異物大珠至圍二寸以下而最圓者置之平地終日不停

哥羅

哥羅漢時聞焉在槃槃東南亦曰哥羅富沙羅國云其

王姓矢利婆羅名米失鉢羅其所治城累石為之城有樓闕門有禁衛宮室覆之以草國有州二十四而無縣庭列儀仗有纛以孔雀羽飾焉兵器有弓箭刀稍皮甲征伐皆乘象一隊有象百頭每象有百人衛之象鞍有鉤欄之中有四人一人執稍一人執弓矢一人執爨一人執刀賦稅人出銀一銖國無蠶絲麻紵惟出吉貝布畜有牛少馬其俗非有官者不得上髮裹頭又嫁娶初問婚惟以檳榔為禮多者至二百盤成婚之時惟以黃

金為財多者至三百兩婦人嫁訖則從夫姓音樂有琵琶橫笛銅鈸鐵鼓鼓簧吹蠡擊鼓死亡則焚尸盛以金罌沈之大海

林邑

林邑本漢日南郡象林縣古越裳界也伏波將軍馬援開南境置此縣其地從廣可六百里城去海百二十里去日南界四百餘里北接九德郡其南界水步道二百餘里有西圖夷亦稱王馬援所植二銅柱表漢家界處

也

馬援北還留十餘戶於銅柱處至隋有三百餘戶悉姓馬土人以為流寓號曰馬流人銅柱尋沒馬流人

常識其處林邑國記馬援樹兩銅柱於象林南界與西屠國分漢之南境又云銅柱山周十里形如倚蓋西跨重巖東臨大海屈璆道里記又云林邑大浦口有五銅柱焉

其國有金山石皆赤色

其中生金金夜則出飛狀如螢火又出玳瑁貝齒吉貝

沈木香吉貝者樹名也其華成時如鷺毳抽其緒紡之

以作布與紵布不殊亦染成五色織為班布沈木香者

土人斫斷積以歲年朽爛而心節獨在置水中則沈故

名曰沈香次浮者棧香也又出猩猩獸多琥珀松脂淪

入地千歲為茯苓又千歲為琥珀又云楓脂謂之琥珀在地其上及傍不生草木深者或八九尺大如斛削去皮焉初如桃膠凝成乃堅其金寶物產大抵與交趾同以磚為城蜃灰塗之居處為閣名曰干蘭皆開北戶以向日或東西無定尊官有二其一曰西那婆帝其二曰薩婆地歌其屬官三等其一曰倫多姓次歌論致帝次乙地伽蘭外官分為二百餘部其長官曰弗羅次曰阿倫如牧宰之差也書樹葉為紙施椰葉為席男女皆以

橫幅吉貝繞腰以下謂之干漫亦曰都漫穿耳貫小鐸
貴者著革履賤者跣行自林邑扶南諸國皆然也其王
戴金花冠形如章甫加纓絡如佛象之飾出則乘象吹
螺擊鼓罩吉貝繖以吉貝為旛旗國不設刑法有罪者
則使象蹋殺之林邑浦外有不勞山罪人亦送此山令
其自死其大姓號婆羅門嫁娶必用八月女先求男由
貴男而賤女也同姓還相婚姻使婆羅門引壻見婦握
手相付呪曰吉利吉利然後成禮人性凶悍果於戰鬪

有弓箭刀槊以竹為弩傳毒於夫樂有琴笛琵琶五絃
頗與中國同每擊鼓以警衆吹蠡以節戎其人深目高
鼻髮拳色黑以幅巾纏身冬月衣袍婦女椎髻四時暄
暖無霜雪王死七日而葬有官者三日庶人一日皆以
函盛屍鼓舞導從輿至水次積薪焚之收其餘骨王則
內金罍中沈之於海有官者以銅沈之海口庶人以瓦
送之於江男女截髮隨喪至水次盡哀而止其寡婦孤
居散髮至老人皆奉釋法文字同於天竺王事竺乾道

鑄金銀人像大十圍後漢末大亂象林縣功曹姓區有
子曰連殺縣令自號為王子孫相承數世其後王無嗣
外甥范熊代立熊死子逸代立晉武帝太康中始來貢
獻咸康二年范逸死奴文篡立文本曰南西卷縣夷帥
范椎奴也嘗牧牛澗中獲二鯉魚化而為鐵因以鑄刀
刀成文對大石嶂而呪之曰鯉魚變化治成雙刀石嶂
破者當王此國進斫石嶂如斷芻藁文心異之范椎嘗
使之商估往來見上國制度至林邑遂教范逸作宮室

城邑及兵車器械逸甚愛信之使為將文乃諧逸諸子或徙或奔及逸死無嗣文偽於隣國迓逸子置毒於漿中殺之遂脅國人自立以逸妻妾置之高樓從已者納之不從者絕其食於是乃攻大岐界小岐界式僕徐狼屈都乾魯扶單等諸國并之有衆四五萬人遣使通表建業其書皆胡字時交州刺史姜莊使所親韓戢謝擢前後監日南郡戢擢並貪殘諸夷患之穆帝永和三年臺遣夏侯覽為太守侵刻尤甚林邑素無土田貪日南

地肥沃常欲畧有之至是因人之怨襲殺覽以其屍祭
天留日南三年乃還林邑交州刺史朱蕃後遣督護劉
雄戍日南文復滅之進寇九德郡殺害吏民遣使告蕃
願以日南北境橫山為界蕃不許文歸林邑尋復屯日
南文死子佛立猶屯日南征西將軍桓溫遣督護滕畎
九真太守灌邃討之追至林邑佛乃請降孝武帝寧康
中遣使貢獻至義熙中每歲來寇日南九真九德等諸
郡殺傷甚衆交州遂致虛弱而林邑亦用疲弊佛死子

胡達立上疏貢金盤碗及金鉦等物胡達死子須達立
須達死子敵真立其弟敵鎡攜其母出奔敵真追恨不
能容其母與弟捨國而之天竺禪位於其甥國相藏麟
固諫不從其甥立而殺藏麟藏麟子又攻殺之而立敵
鎡同母異父弟曰文敵文敵復為扶南王子當根純所
殺大臣范諸農平其亂自立為王諸農死子陽邁立陽
邁初在孕其母夢生兒有人以金席藉之其色光麗夷
人謂金之精者為陽邁若中國云紫磨者因以為名宋

永初二年遣使貢方物武帝以陽邁為林邑王陽邁死
子咄立纂其父復曰陽邁元嘉初陽邁侵暴日南九德
諸郡交州刺史杜宏文建牙欲討之聞有代乃止八年
又寇九德郡入四會浦口交州刺史阮彌之遣隊主桓
道生率兵赴討攻區粟城不克乃引還十二年十五年
十六年十八年每遣使入獻獻既陋薄而寇盜不已文
帝忿其違傲二十三年使交州刺史檀和之振武將軍
宗慤伐之和之遣司馬蕭景憲為前鋒陽邁聞之懼欲

輸金一萬斤銀十萬斤銅三十萬斤還所畧日南戶口
其大臣蒿僧達諫止之乃遣大帥范扶龍戍其北界區
粟城景憲攻城克之乘勝即克林邑陽邁父子並挺身
逃奔獲其珍異皆是未名之寶又銷其金人得黃金數
十萬斤和之後坐事免官病卒見胡神為祟云孝武孝
建二年林邑又遣長史范龍跋奉使貢獻除龍跋揚武
將軍大明二年林邑王范神成又遣長史范流奉表獻
金銀器香布諸物明帝泰豫元年又遣使獻方物齊永

明中范文贊累遣使貢獻梁天監九年文贊死子天凱
奉獻白獼猴詔加持節都督緣海諸軍事威南將軍林
邑王天凱死子弼毳跋摩立奉表貢獻普通七年王高
戍勝凱遣使獻方物詔以為持節都督緣海諸軍事綏
南將軍林邑王大通元年又遣使貢獻二年行林邑王
高戍律陀羅跋摩遣使貢獻詔以為持節都督緣海諸
軍綏南將軍林邑王六年又遣使貢方物自是迄于陳
氏使命弗絕隋文帝平陳後遣人通表中國既而職貢

不至時天下無事朝臣多言林邑多奇寶者仁壽末上遣大將軍劉方為驩州道行軍總管率欽州刺史甯長真驩州刺史李暉開府秦雄步騎萬餘及犯罪者數千人擊之其王梵志乘巨象而戰方軍不利方乃多掘土坑草覆其上因以兵挑之方與戰偽北梵志逐之其象多陷轉相驚駭軍遂亂方縱兵擊大破之遂棄城而走方入其都獲其廟主十八枚皆鑄金為之蓋其有國十八葉矣方既平其國班師而歸故地遂空梵志收合遺

民別建國邑遣使謝罪唐貞觀中其王范頭利死國人立頭利之女為女王王獨任國中不寧大臣可倫翁定乃立頭利之姑子諸葛地者為王以女王妻之其國乃定諸葛地既立遣其使可倫因地盤獻火珠狀如水精日正午以珠承影取艾衣之而火輒見云得之於羅刹國焉

扶南

扶南在日南郡之南海西大灣中去日南可七千里在

林邑西南三千餘里城去海五百里有大江廣十里從西流東入海其國廣輪三千餘里土地洿下而平博氣候風俗大較與林邑同地出金銀銅錫沈木香象犀孔翠五色鸚鵡又有金鋼可以刻玉狀似紫石英其所生乃在百丈水底磐石上如鍾乳人沒水取之竟日乃出以鐵椎鎚之而不傷鐵反自損然以羚羊角扣之漼然冰泮又有老鵬入海化為玳瑁可以截作馬勒謂之珂國有城邑宮室王居重閣以木柵為城海邊生大若葉長

八九尺編其葉以覆屋國人亦為閣居為船長八九丈
廣纔六七尺頭尾似魚人皆醜黑拳髮文身裸體徒跣
以耕種為務一歲種三歲獲又好雕文刻鏤食器多以
銀為之所居不穿井數十家共一池汲引之俗事天神
以銅為像二面者四手四面者八手手各有所持或小
兒或鳥獸或日月其王出入乘象嬪侍亦然王坐則偏
踞翹膝垂左膝至地以白疊敷前設金盆香爐於其上
國俗居喪則剃除鬚髮死者有四葬水葬則投之江流

火葬則焚為灰燼土葬則瘞埋之鳥葬則棄之山野人性貪吝男女恣其奔隨國法無牢獄有訟者先齋三日乃燒斧令極赤訟者捧行七步又以金鑲或雞子投沸湯中令採取之若無實者手即爛有理者則否又於城溝養鰐魚門外圈猛獸有罪者輟以餵猛獸及鰐魚魚獸不食為無罪三日乃放之鰐魚大者長三丈餘狀如鼉有四足喙長六七尺兩邊有齒利如刀劍常食魚或得麋鹿及人亦皆噉之蒼梧以南及外國皆有之其先

世以女子為王有女王字柳葉年少壯健有似男子其南有激國人名混潰者善事鬼神夢神賜之弓乘賈人舶入海混潰晨起詣神廟果得弓遂依夢乘舶入海入扶南外邑柳葉人衆見外國舶至欲劫取之混潰引弓射其船穿度一面矢及侍者柳葉大懼舉衆降於混潰混潰納以為妻惡其裸露乃令柳葉穿疊布貫其首焉混潰據扶南生七子分王七邑其後王混盤況以詐力間諸邑令相疑阻因舉兵攻并之混盤況年九十餘死

立中子盤盤以國事委其大將范蔓盤盤立三年死國人共舉蔓為王蔓勇健有權略復以兵威攻伐旁國咸服屬之自號扶南大王乃作大船窮漲海開國十餘闕地五六十里次當伐金鄰國蔓遇疾遣太子金生代行蔓姊子旃因篡蔓自立遣人詐金生而殺之蔓死時有乳下兒名長逃在民間至年二十乃結國中壯士襲殺旃旃大將范尋又攻殺長而代立吳時遣中郎康泰宣化從事朱應使於尋國國人猶裸惟婦人著貫頭衫泰

應謂曰國中實嘉但人褻露可怪耳尋始令國中男子
著橫幅橫幅今干漫也大家乃截錦為之貧者用布晉
武帝太康中尋始遣使貢獻穆帝升平元年有竺旃檀
稱王奉表獻馴象詔以勞費停之其後王憍陳如本天
竺婆羅門也有神語曰應王扶南憍陳如心悅南至盤
盤扶南人聞之舉國欣戴迎而立焉復改制度用天竺
法憍陳如死後王持黎陀跋摩宋元嘉中頻遣使貢方
物齊永明中王憍陳如闍邪跋摩遣使入獻梁天監初

跋摩復表送珊瑚佛像并珍異物詔授安南將軍扶南王自是累遣使入貢十二年跋摩死庶子留陀跋摩殺其嫡弟自立十六年遣使竺當抱老奉表貢獻十八年復表送天竺旃檀瑞象婆羅樹葉并火齊珠鬱金蘇合等香普通元年中大通二年大同九年累遣獻方物三年復獻生犀又言其國有佛髮長一丈二尺詔遣沙門釋曇寶隨使往迎之隋時其國王姓古籠遣使至長安唐武德後亦頻入貢貞觀中又獻白頭國二人於洛陽

云白頭國在扶南之西參半之西南男女生皆素首身
又凝白居山洞之中四面巖險故人莫至與參半國相
接

頓遜

頓遜梁時聞焉

一曰
典遜

在海崎山上地方千里城去海十

里有五王並羈屬扶南北去扶南可三千餘里其國之
東界通交州其西界接天竺安息徼外諸國賈人多至
其國交易焉所以然者頓遜廻入海中千餘里漲海無

涯岸賈舶未嘗得逕過也其市東西交會日有萬餘人
珍物寶貨無所不有又有酒樹似安石榴採其花汁傳
甕中數日成酒地出藿香插枝便生葉如都梁以袞衣
國有區撥等花十餘種冬夏不衰日載數十車貨之其
花燥更芬馥亦未為粉以傅身焉其俗特多鳥葬人將
死者親賓歌舞送於郭外有鳥口如鵝似鸚鵡而紅色
飛來萬許家人避之鳥食肉盡乃去燒其骨沈於海中
以為上行人也云必生天鳥若廻翔不食其人乃自悲

傷自以為已有穢乃更就火葬以為次行人也若不能生入火又不被鳥食以為下行人也

毗騫

毗騫梁時聞焉在頓遜之外大海洲中去扶南八千里傳其王身長丈二尺頭長三尺自古不死莫知其年王神聖國中人善惡及將來事王皆知之是以無敢欺者南方號曰長頭王國俗有室屋衣服噉粳米其人言語小異扶南有山出金金露生石上無央限也國法刑人

並於王前噉其肉國內不受估客有往者亦殺而噉之
是以商旅不敢至王常樓居不血食不事鬼神其子孫
生死如常人惟王不死扶南王數使與書相報答贈遺
人食器如圓盤又如瓦塢名為多羅受五升又如椀者
受一升王亦能作天竺書書可三千言說其宿命所出
與佛經相似並論善事又傳扶南東界即大漲海海中
有大洲洲上有諸薄國國中有馬五洲復東行漲海千
餘里至自然火洲其上有樹生火中洲左近人剥取其

皮紡織作布極得數尺以為手巾與蕉麻無異而色微青黑若小垢洿則投火中復更精潔或作燈炷用之不盡

干陀利

干陀利宋時通焉在南海洲上其俗與林邑扶南畧同出班布吉貝檳榔檳榔特精好為諸國之最宋孝武世王釋婆羅那隣陀遣長史竺留陀獻金銀寶器梁天監元年其王瞿曇跋陀羅夢一僧謂曰江表有聖人汝當

遣使奉禮則土地豐樂不然則境內不得自安陀羅未
之信也既而又夢此僧云汝既不信我當與汝往觀乃
於夢中至建鄴拜觀天子既覺心異之陀羅本工畫乃
寫夢中所見武帝容質仍遣使并畫工奉表獻玉盤等
物使人摹寫帝形回校本畫無少異焉後陀羅死子毗
針邪跋摩立十七年遣長史毗員跋摩貢金芙蓉雜香
藥等普通初復獻方物自後無聞

狼牙脩

狼牙脩梁時通焉在南海中其界東西三十日行南北
二十日行北去廣州二萬四千里土氣物產與扶南畧
同偏多棧沈婆律等香其俗男女皆袒而被髮以吉貝
為干澇其王及貴臣乃加雲霞布以覆髀以金繩為絡
帶金環貫耳女子則披布以纓絡繞身其國累磚為城
重門樓閣王出乘象有幡旄旗鼓罩白蓋兵衛甚設國
人說立國以來四百餘年後嗣衰弱王族有賢者國人
歸向之王聞乃加囚執其鎖無故自脫王以為神不敢

加害但逐出境遂奔天竺天竺以為賢妻以長女俄而
狼牙脩王死大臣迎還為王二十餘年死子婆伽達多
立天監十四年遣使阿撒多奉表

婆利

婆利梁時通焉在廣州東南海中洲上自交趾浮海南
過赤土丹丹國乃至其國去廣州二月日行國界東西
五十日行南北二十日行有百二十六聚土氣暑熱如
中國之盛夏穀一歲再熟草木常榮海出文螺紫貝有

石名蚶貝羅初採之柔軟刻削為物暴乾之遂大硬海
出珊瑚有鳥名舍利解人語其國人皆黑色穿耳附璫
披吉貝如帔及為都漫王乃用班絲者以纓絡繞身頭
著金長冠高尺餘形如弁綴以七寶之飾帶金裝劍偏
坐金高座以銀鐙支足侍女皆為金花雜寶之飾或持
白毼拂及孔雀扇王出以象駕輿輿以雜香為之施羽
蓋珠簾其導從吹螺擊鼓國人善投輪刃其大如鏡中
有竅外鋒如鋸遠以投人無不中者其餘兵器與中國

畧同俗類真臘物產同於林邑其殺人及盜截其手姦者鎖其足期年而止祭祀必以月晦用盤貯酒肴浮之流水每十一月必設大祭王姓憍陳如自古未通中國問其先及年數不能記自言白淨王夫人是其國女梁天監十六年遣使奉表獻金席等普通三年其王頻伽復遣使珠智獻白鸚鵡青蟲兜鍪琉璃器吉貝羅杯雜香藥等數十種隋大業中又遣使入貢其王姓刹利邪伽名護濫那婆官曰獨訶耶拏次曰獨訶氏拏唐貞觀

中亦遣使朝獻云

槃槃

槃槃宋時通馬在南海大洲中北與林邑隔小海自

州船行四十日至其國其王曰楊栗翼音翅以上曰

楊德武連以上無得而紀百姓多緣水而居國無城皆

賢木為柵王坐金龍牀每坐諸大人皆兩手交抱肩而

跽

暨九反

又其國多有婆羅門自天竺來就王乞財物王

甚重之其大臣曰敎郎索濫次曰崑崙帝也次曰崑崙

教和

胡卧反

次曰崑崙教帝索甘旦其言崑崙與古龍聲

相近故或有謂為古龍者其在外城曰那延猶中夏刺
史縣令其矢多以石為鏃稍則以鐵為刃有僧尼寺十
所僧尼讀佛經皆肉食而不飲酒亦有道士寺一所道
士不食酒肉讀阿修羅王經其國不甚重之俗皆呼僧
為比丘呼道士為貪宋元嘉孝建大明中並遣使貢獻
梁中大通元年其王奉表送佛牙及畫塔并獻沈檀等
香數十種六年復遣使送菩提國舍利及畫塔菩提樹

葉詹糖等香隋大業中亦朝貢於長安

赤土

赤土隋時通焉扶南之別種也在南海中直崖州之南
水行百餘日而達所都土色多赤因以為號東波羅刺
國西婆羅娑國南訶羅旦國北拒大海地方數千里其
王姓瞿曇氏名利富多塞不知有國近遠稱其父釋王
位出家為道傳位於利富多塞在位十六年矣有三妻
並鄰國女也居僧祇城有門三重相去各百步許每門

圖畫菩薩飛仙之像懸金花鈴眊婦人數十人或奏樂
或捧金花又飾四婦人容飾如佛塔邊金剛力士之狀
夾門而立門外者持兵仗門內者執白紵夾道垂素網
綴花王宮諸屋悉是重閣北戶北面而坐三重之榻衣
朝霞布冠金花冠垂雜寶纓絡四女子立侍左右兵衛
百餘人王榻後作一木龕以金銀五香木雜鈿之龕後
懸一金光焰夾榻又樹二金鏡鏡前並陳金甕甕前各
有金香爐當前置一金伏牛前樹一寶蓋蓋左右皆有

寶扇婆羅門等數百人東西重行相向而坐其官薩陀迦羅一人陀拏

女除反

達义二人迦利密迦三人共掌政

事俱羅末帝一人掌刑法每城置鄒邪迦一人鉢帝十人其俗皆穿耳翦髮無跪拜之禮以香油塗身敬佛尤甚婆羅門婦人作髻於項後男女通以朝霞朝雲雜色布為衣豪富之家恣意華麗惟金鎖非王賜不得服用每婚嫁擇吉日女家先期五日作樂飲酒父執女手以授壻七日乃配既娶即分財別居惟少子與父居父母

兄弟死則剃髮素服就水上構竹為棚棚內積薪以屍
置上燒香建幡吹蠡擊鼓以送火焚薪遂落於水貴賤
皆同惟國王燒訖收灰貯以金瓶藏於廟屋氣候冬夏
常溫雨多霽少種植無時特宜稻稭白豆黑麻自餘物
產多同於交趾以甘蔗作酒雜以紫瓜根酒色黃赤味
頗香美復以椰漿為酒亦皆適口又有雙六雞卜之戲
隋煬帝時募能通絕域者大業三年屯田主事常駿虞
部主事王君政等請使赤土帝大悅遣齋物五千段以

賜赤土王其年十月駿等自南海郡乘舟晝夜二旬每日遇便風至焦石山而過東南泊陵迦鉢拔多洲西與林邑相對上有神祠焉又南行至師子石自是島嶼連接又行二三日西望見狼牙脩國之山於是南達雞籠島至於赤土之界其王遣婆羅門鳩摩羅以舶三十艘來迎吹蠡擊鼓以樂隋使進金鎖纜船月餘至其都王遣其子那邪迦請與駿等禮見先遣人送金盤貯香花并鏡鑷金合二枚貯香油金瓶八枚貯香水白疊布四

條以供使者盥洗其日鄒邪迦又將象二頭持孔雀蓋以迎使人并致金盤金花以藉詔函男女百人奏鼙鼓婆羅門二人導路至王宮駿等奉詔書上閤王以下皆坐宣詔訖引駿等坐奏天竺樂事畢駿等還館又遣婆羅門就館送食以草葉為盤其大方丈因謂駿曰今是大國臣非復赤土國王矣後數日請駿等入宴儀衛導從如初見之禮王前設兩牀牀上並設草葉盤方一丈五尺上有黃白紫赤四色之餅牛羊魚鼈猪瑇瑁之肉

百餘品延駿升牀從者於地布席各以金鍾置酒女樂迭奏禮遺甚厚尋遣鄒邪迦隨駿等貢方物并獻金芙蓉冠龍腦香以鑄金為多羅葉隱起成文以為表金函封之令婆羅門以香花奏蠡鼓而送之既入海見綠魚羣飛水上浮海十餘日至林邑東南並步浪反山而行其海水色黃氣腥舟行一日不絕舟人云大魚糞也循海北岸達於交趾駿以六年春與鄒邪迦於宏農謁帝帝大悅授駿等執戟都尉鄒邪迦等官賞各有差

真臘

真臘隨時通焉在林邑西南本扶南之屬國也去日南
郡舟行六十日而至南接車渠國西有朱江國其王姓
刹利名質多斯那自其祖漸以彊盛至質多斯那遂兼
扶南而有之質多斯那死子伊奢那先代立居伊奢那
城郭下二萬餘家城中有一大堂是其王聽政之所總
大城三十所城有數千家各有部帥官名與林邑同其
王三日一聽朝坐五香七寶牀上施寶帳以文木為竿

象牙金鈿為壁狀如小屋懸金光焰有同於赤土前有
金香案命二人侍側王著朝霞吉貝縵絡腰腹下垂至
頸頭戴金寶花冠被真珠纓絡足履草屣耳懸金瑤常
服白疊以象牙為屨若露髮則不加纓絡臣下服制大
抵相類有五大臣一曰孤落支二曰相高憑三曰婆何
多陵四曰舍摩陵五曰髯羅婁及諸小臣朝於王者輒
於階下三稽首王呼上階則跪以兩手抱膊遶王環坐
議政事訖跪伏而去階庭門閣侍衛有千餘人被甲持

仗其國與參半朱江二國和親數與林邑陀桓二國爭戰其人行止皆持兵仗若有攻伐因而用之其俗非王正妻子不得為嗣王初立日所有兄弟並刑殘之或去其一指或劓其鼻皆別處供給不得仕進人形小而色黑婦人亦有白者悉拳髮垂耳性氣捷勁居處器物頗類赤土以右手為淨左手為穢每旦澡洗以楊枝淨齒讀誦經呪又澡洒乃食食罷還用楊枝淨齒又讀經呪飲食多酥酪沙糖杭粟米餅飲食之時先取雜肉羹與

飯相和手搏而食之婚嫁者男女二家各八日不出晝
夜燃燈不息男婚禮畢即與父母分財別居父母死小
兒未婚者以餘財與之若婚畢財物入官喪葬兒女皆
十日不食剔髮而喪僧尼道士親故皆來聚會作音樂
送之以五香木燒屍收灰以金銀瓶盛送大水之內貧
者或用瓦而以五采畫之亦有不焚屍送之山中任野
獸食之其國北多山阜南有水澤地氣尤熱無霜雪饒
瘴癘毒蟲宜粱稻少黍粟果菜與日南九真相類異者

有婆羅那娑樹無花葉似柿實似冬瓜菴羅花葉似棗
實似李毗野樹花似木瓜葉似杏實似楮婆田羅樹花
葉實並似棗而小異歌畢佗樹花似林禽葉似榆而厚
大實似李其大如升自餘多同九真海中有魚名建同
四足無鱗鼻如象吸水上噴高五六十尺有浮胡魚形
似鮐背如鸚鵡有八足多大魚半身出覩之如山每五
六月中毒氣流行即以白猪白羊於城西門外祠之
不然五穀不登畜多死人疾疫近都有陵迦鉢婆山上

有神祠每以兵二千人守衛之城東有神名婆利多祭用人肉其王年別殺人以夜祠禱亦有守衛者千人其敬鬼如此多奉佛法尤信道士佛及道士並立像於館隋大業中遣使貢獻煬帝禮之甚厚唐武德六年亦奉表貢方物

羅刹

羅刹隋時通焉在婆利之東其人極陋朱髮黑身獸牙鷹爪時與林邑人作市輒以夜晝日則掩其面煬帝大

業三年遣使常駿等使赤土經其國焉

投和

投和隋時聞焉在南海大洲中真臘之南自廣州西南水行百日至其國王姓投和羅名脯邪迄遙治數城覆屋以瓦並為閣而居屋壁皆彩畫之城內皆王宮室城外人居可萬餘家王宿衛百餘人每臨朝則衣朝霞冠金冠耳掛金鐶頸挂金涎衣足履寶裝皮履官屬有朝請將軍總知國政又有參軍功曹主簿城局金威將軍

贊治贊府等官分治文武又有州及郡縣州有參軍郡有金威將軍縣有城局其為長官初至各選官僚助治政事刑法盜賊重者死輕者穿耳及鼻并鑢鬚私鑄銀錢者截腕國無賦稅俱隨意貢奉無多少之限多以農商為業國人乘象及馬一國之中馬不過千匹又無鞍轡惟以繩穿頰為之節制音樂則吹蠡擊鼓死喪則祠祀哭泣又焚屍以鬯盛之沈於水中若父母之喪則截髮為孝其國市六所貿易皆用銀錢小如榆莢有佛道

有學校文字與中夏不同訊其耆老云王無始名齊杖
摩其屋以草覆之王所坐榻圓如佛塔以金飾之門皆
東開坐亦東向唐貞觀中遣使奉表以金函盛之又獻
金榼金釘寶帶犀象海物數十品

丹丹

丹丹隋時聞馬在羅摩羅國西北振州東南

振州與珠崖同島上

王姓刹利名尸陵迦治所可二萬餘家亦置州縣以相
統領王每晨夕二時臨朝其大臣八人號曰八座並以

婆羅門為之王每以香粉塗身冠通天冠挂雜寶纓絡
身衣朝霞足履皮履近則乘輿遠則馭象其攻伐則吹
蠡擊鼓兼有旛旗其刑法盜賊無多少皆殺之土出金
銀白檀蘇方木檳榔其穀惟稻畜有沙牛羖羊猪雞鵝
鴨麋鹿鳥有越鳥孔雀果蓏有蒲萄石榴瓜瓠菱蓮菜
有葱蒜蔓菁

邊斗

邊斗

一云班斗

都昆

一云都軍

拘利

一云九雄

比嵩皆隨時聞焉自扶

南渡金隣大灣南行三千里有此四國其農作與金隣
同其人多白色都昆出好棧香藿香及流黃其藿香樹
生千歲根本甚大伐之四五年木皆朽敗惟中節堅固
芬香獨存取以為香

杜薄

杜薄隋時聞焉在扶南東漲海中直渡海數十日而至
其國人貌白皙皆有衣服國有稻田女子作白疊華布
地出金銀鐵以金為錢出雞舌香可含不入衣服雞舌

之為木也氣辛而厲人與禽獸不能近故未有識其樹者華熟自零隨水而出人方得之杜薄洲有十餘國城皆稱王

薄刺

薄刺隋時聞焉在拘利南海灣中其人色黑而齒白眼赤男女並無衣服

敎焚

敎焚抱朴子云敎焚洲在南海中薰綠水膠所出膠如

楓脂不可多得所以然者正患狢狢

上音詰
下音屈

獸害人不

敢到其地狢狢大者重十斤狀如水獺其頭身及他處
了無毛惟從鼻上以竟脊至尾上有毛廣一寸許青毛
長三四分其無毛處則如韋囊人張捕得之斬刺不傷
積薪烈火束縛之投諸火中新盡而此獸不焦須以大
杖打之皮不傷而骨碎都盡乃死耳

火山

火山隋時聞焉去諸薄東五千里國中山有火雖雨不

息火中有白鼠扶南土俗傳云火洲在馬五洲之東可
千餘里春月霖雨雨止則火然洲上林木得雨則皮黑
得火則皮白諸左右洲人以春月取其木皮績以為布
或作燈炷布若小穢投之火中使潔又有加營國在諸
薄國西有山周三百里從四月火生正月火滅火然則
草木葉落如中國寒時人以三月至此山取木皮績為
浣火布

無論

無論隋時聞焉在扶南西二千餘里其國有大道左右
夾種枇杷樹及諸華果人行其下常有元陰十里一亭
亭皆有井俗食麥飯飲蒲萄酒酒如膠若飲即以水和
之味甚甘美

乾

樹

山

通志卷一百九十八